

A Tatatai ane Jon

A warwara talapor nigo

A buk ne e Jon i tumusi sur ir warwara talapor ana tatatai ning i oroi i. I ning a halinla ning a bonot pa pisir naur a kakak a asaer ane Iesu. I tumus a buk ne, ning i kes na karabus tumo na lolo Patimos. I tumusi diono na bonot pa pisir dilima na rau lamur tana tinan ane Iesu usaot na langit. Ana raula ning, a tarai a lotu la pastek a galis a mamahat, pa tarai la alaulau la pa di umkol a galis onla otleng. E God i asangan e Jon ana tatatai, anasa i mang sur lar tur rakrakai pa lar nuk pas e Iesu.

E Jon i oroi i ana tatatai mang e God i tasman a ututnala rop ning ir hanot, pa ir tolsot pas e Satan. Pa ana ararop a rakrakan hanua, a mamahat ning dala pasteki te lapiu ir rarop. Pa e God ir alaun pas a tarai ning la tortorot, pa ir warkurai a tarai ning bel la tortorot. Pa ka sang tar a wakak a hanua sur la ning anunai.

A galis a utna te na buk ne i arlar ana warwara larlar.

A tinan ana buk Tatatai:

A kamkama buk ne (1:1-8)

A tumtumus tetek a tarai a lotu ting na mais a hanua (1:9–3:22)

A Leklek i sapang a buk ning di ka hin tari (4:1–8:1)

Mais a angelo la wus mais a tawuru (8:2–11:19)

A dregon pa naur a rokoio na inagoi
 (12:1–13:18)
 Na tatatai (14:1–15:8)
 Mais a besen a balakut ane God (16:1-21)
 E Babilon i punga pa e God i tolsot pas e Satan
 (17:1–20:10)
 A pukakiar a warkurai (20:11-15)
 A tona langit pa tona rakrakan hanua
 (21:1–22:6)
 A ararop a warwara (22:7-21)

¹ A buk ne, a warwara puasa ane Iesu Karisito, ning e God i saran tari tana, suir asangan tar anuna tena titol orosla ana saning milau ir hanot. E Iesu i sune sen anuna angelo tetek anuna tena titol oros e Jon, suir warwara puasa ana ututnala ne tana.

² E Jon i warwara talapor ana ututnala rop ning ka oroi tari. Ine a ututnala ning, a warwara ane God pa warwara talapor ane Iesu Karisito.

³ Esining ir was a warwarala na propet ne ir angis, pa la otleng ning lar longori pa lar muri, la otleng lar angis, anasa a taim ning a ututnala ne ir hanot ka milau.

A tumtumus ane Jon tetek a tarai a lotu ting na mais a hanua

⁴ Iau e Jon, a tumtumus tetek mulo a tarai a lotu ting na mais a hanua tumo na papar Esia.

A marmaris pa balmolmol tetek mulo miting ta esaning i laun nigo, i laun onone pa ir hanot lamur, pa tana mais a ingun otleng kanisa lanigo na nuna keskes a king,

⁵ pa ta e Iesu Karisito, a momol a tena warwara talapor oe God, a ningnigo tanla ning lar laun ulak kusun a minat, pa ningnigo anuna kingla te na rakrakan hanua.

I maris dala, pa i alangolango pas dala kusun anundala na toltol laulau ana sulukna,

⁶ pa i akes dala sur dalar warkurai taum onoi pa sur dala na tena artabar tetek e Tamana, esaning anuna God. A matatar pa rakrakai rop i kes oe Iesu Karisito, bel ir rarop. Amen.

⁷ Oroi, i han purum ana diah baktu,
pa matana tarai rop lar oroi i,
pa la otleng ning la so tari,

pa mangis a tarai rop te na rakrakan hanua lar domos anasa onoi.

Ir hanot larotning. Amen.

⁸ A Leklek e God i atongi mang, “Iau a Alpa pa Omega^{*}, esaning i laun nigo, i laun onone pa ir hanot lamur, esaning i rakrakai kol.”

E Jon i oroi takai i arlar ana Nat a Barsan

⁹ Iau e Jon, a tasimulo pa halimulo ning dala tur taum oe Iesu ana kankan, pa ana nuna matanitu pa tuntunur rakrakai ning dala kilang a kankan. A kes na karabus tumo na lolo Patimos, anasa a warawai ana warwara ane God, pa warwara talapor ane Iesu.

1:5: 1:5 Kolosi 1:18; Buk Song 89:27 **1:6: 1:6** 1 Pita 2:9; Tatatai 5:10; 20:6 **1:7: 1:7** Daniel 7:13; Sekaraia 12:10; Matiu 24:30; Jon 19:34-37; 1 Tesalonika 4:17 **1:8: 1:8** Tatatai 21:6; 22:13 ^{*} **1:8: 1:8** Alpa a ningnigo na matana buk ana warwara Grik, pa Omega a ararop a matana buk.

¹⁰ Ana pukakiar anuna Leklek[†] a bukus ana Talngan Tabu, pa tumo lamur tak, a longor a tnan elngen takai, i arlar ana tinangis a tawuru.

¹¹ I atongi larne, “A utna ning u oroi i, ur tumus akesi ting na buk ning di hini pa ur abaran seni utumo tetek a tarai a lotu ting na mais a hanua ne: Epeses, Smerna, Pergamum, Tiatira, Sardis, Piladelpia pa Laodisia.”

¹² A talingir suar oroi esining i warwara tetek iau. Ning a talingir, a oroi a mais a turtur a lam na gol.

¹³ Pa na arpotor tana turtur a lamla a oroi takai “i arlar ana Nat a Barsan,” i mermer ana barbarah a kaen i barah misaot tuk tumo na naur a hana, pa i dot a malwasna ana inau a gol.

¹⁴ A pukulna pa hih a pukulna dia kokok kol, arlar ana hih a sipsip, pa i arlar otlang ana busa na top, pa naur a matana i arlar ana irnga na iah.

¹⁵ Naur a hana dia arlar ana bras ning di ka tun totoh tari ana iah, pa elngena i arlar ana unga na malum ning i naro.

¹⁶ I tong mais a nangnang ana sot a kuna, pa liwan a harum, ning naur a risna rop dia harat kol, kaning na pahana i gom pasi. Pa patarna i arlar ana kamis ning i sasai kol.

¹⁷ Ning a oroi i, a punga purum tar milau naur

[†] **1:10: 1:10** A pukakiar anuna Leklek a kamkam a warwara mang a ningnigo na pukakiar ana wik ning di akinalang a kamkamtur ulak ane Iesu. **1:13: 1:13** Daniel 7:13; 10:5 **1:14: 1:14** Esekiel 43:2; Daniel 7:9; 10:6; Tatatai 2:18; 19:12; 14:2 **1:16: 1:16** Hibru 4:12; Tatatai 2:12; 19:15 **1:17: 1:17** Aisaia 44:6; 48:12; Tatatai 2:8; 22:13

a hana, arlar ana minat. Lamur i suah tar a sot a kuna saot hok, pa i atongi mang, “Gong u matmataut, iau a ningnigona pa araropna.

¹⁸ Iau esaning i laun. Ia ka mat pas, oroi i, ia ka laun tikin pa a tong a kila ana minat pa ana hanua Hedes, a hanua anunla ning la mat.

¹⁹ “I maining, ur tumus a ututnala ning u ka oroi tari: a ututnala ning ka hanot pa ututnala ning ir hanot lamur.

²⁰ Ine a kamkama ututnala na pidik ana mais a nangnang ning u ka oroi tari te na sot a kuk, pa mais a turtur a lam na gol: A mais a nangnang i tur aslang a angelola anuna tarai a lotu ting na mais a hanua, pa mais a turtur a lam i tur aslang a tarai a lotu ting na mais a hanua.”

2

A warwara tetek a tarai a lotu tumo e Epeses

¹ “Ur tumtumus tetek a angelo anuna tarai a lotu tumo e Epeses mang:

Na warwara ne anun esaning i tong mais a nangnang ana sot a kuna, pa i han potor ting na mais a turtur a lam na gol.

² A tasman anumulo na titol pa anumulo na rakrakai a titol, pa numulo a tuntunur rakrakai ning mulo kilang a kankan. A tasmani mang bel mulo noren tar na laulau a tarai. Pa mulo ka lar tar la ning la atong la na aposel, ika bel la na aposel momol, pa mulo ka oroi lalan la mang na tena asasongo.

³ Mulo ka kilang a kankan anasa mulo anuki, ika bel mulo ngoro, mulo gomo rakrakai ot.

⁴ Ika a tiu mulo ana utna ne: Bel ma mulo mang sur iau, arlar ning nating mulo mang sur iau.

⁵ Mulor nuk pas anumulo a wakak a keskes lanigo ning mulo ka punga tar kusuni! Mulor lingir a nuknukimulo, pa mulor tol ulak anumulo na titol ning lanigo mulo toli. Ning bel mulor lingir a nuknukimulo, ar hanot tetek mulo, par kibas sen anumulo a turtur a lam kusun a gasna.

⁶ Ika takai a utna ning mulo toli i wakak larne: Mulo nget a titolla anun na tarai ning la mur a asaer ane Nikolas, ning iau otleng a ngeti.

⁷ Esining a talngana kaning, i wakak sur ir longor a warwara ne a Talngan Tabu i atongi tetek a tarai a lotu ting na hananuala. Esining i tur rakrakai tuk ana araropna, ar malmaling pasi suir hangan ting na rakai a lalaun, ning kaning na Paradais ane God.

A warwara tetek a tarai a lotu tumo e Smerna

⁸ “Ur tumtumus tetek a angelo anuna tarai a lotu tumo e Smerna mang:

Na warwara ne anun esaning a ningnigona pa araropna, ning i mat pas, pa i laun ulak.

⁹ A tasman a kankan ning i monong mulo, pa numulo a keskes a kapan, ika mulo kes na leklek ot! A tasman a warwara laulaula ning dingla na tarai la atongi omulo. La ning, la

atongi mang la na te Juda, ika bel la na te Juda, la na tarai a lotu ane Satan.

¹⁰ Gong mulo matatan a kankan ning milau ir hanot tetek mulo. Oroi i, e Satan ir akas tar dingla na tarai omulo uting na karabus suir lar mulo, pa mulor kilang a kankan ana ning a bonot a pukakiar. Mulor tur rakrakai ot ana anumulo a tortorot tuk ana pukakiar ning mulor mat ono, par saran tar a lalaun tetek mulo, larning di saran a arlou tetek tik ning i tolsot pas a arsoksok.

¹¹ Esining a talngana kaning, i wakak sur ir longor a warwara ne a Talngan Tabu i atongi tetek a tarai a lotu ting na hananuala. Esining i tur rakrakai tuk ana araropna, a munaur a minat bel ir alaulau i.

A warwara tetek a tarai a lotu tumo e Pergamum

¹² “Ur tumtumus tetek a angelo anuna tarai a lotu tumo e Pergamum mang:

Na warwara ne anun esaning anuna liwan a harum naur a risna rop dia harat kol.

¹³ A tasman a hanua ning mulo kes ia, a hanua ning e Satan i kes na king ia. Ika mulo tur rakrakai ana risak. Ning di umkol e Antipas, bel mulo han masik kusun iau ana numulo a tortorot. Esaning anuk a momol a tena warwara talapor, ning di umkoli ting na numulo a hanua, ning e Satan i kes ia.

¹⁴ Ika a tiu mulo ana ututnala ne: Dingla na tarai kaning na arpotor tamulo, la ka mur a asaer ane Balam, esaning i asaer e Balak suir asobor a tarai Israel pa la tol a toltol laulau, ning la ien a utna na hangan ning di ka artabar tar ono tetek a asasongo na godla, pa la tol na toltol a pamuk.

¹⁵ Larka otleng ning, dingla na tarai omulo la ka mur a asaer ane Nikolas.

¹⁶ Mulor lingir a nuknukimulo! Ning bel, ar hanot kapit tetek mulo, par harum taum onla ning la mur a asaer ane Nikolas, ana liwan a harum ning kane na pahak a gom pasi.

¹⁷ Esining a talngana kaning, i wakak sur ir longor a warwara ne a Talngan Tabu i atongi tetek a tarai a lotu ting na hananuala. Esining i tur rakrakai tuk ana araropna, ar tabari on ta mana ning i kes kumna. Par saran tar otleng a kokok a hat di ka tumus tar a tona rising ono, ning bel tik i tasmani. I sot ka, ning ar saran tar a hat ne tana, ir tasmani.

A warwara tetek a tarai a lotu tumo e Tiatira

¹⁸ “Ur tumtumus tetek a angelo anuna tarai a lotu tumo e Tiatira mang:

Na warwara ne anuna Nat e God, esaning naur a matana i arlar ana irnga na iah, pa naur a hana dia arlar ana bras ning di ka tun totoh tari ana iah.

2:14: 2:14 Namba 22:1–25:2; 31:16; 2 Pita 2:15 **2:16: 2:16**
 Tatatai 3:11 **2:17: 2:17** Kisim Bek 16:4, 14-15, 33-34; Jon 6:48-50;
 Aisaia 62:2 **2:18: 2:18** Tatatai 1:14-15

¹⁹ A tasman anumulo na titol, anumulo na marmaris, anumulo na tortorot, anumulo na titol na arnangai pa numulo na tuntunur rakrakai ning mulo kilang a kankan. Pa a tasmani mang anumulo na titol anone, la itna kol tan anumulo na titol ning mulo toli nating.

²⁰ Ika a tiu mulo ana utna ne: Bel mulo lu sen e Jesabel, a hane ning i atongi mang i a propet. I asaer rongon anuk na tena titol oros, sur lar tol a toltol a pamuk pa sur lar ien a utna ning di ka artabar tar ono tetek a asasongo na godla.

²¹ Ia ka saran tar a taim tana suir lingir a nuknukna kusun anuna pamuk a toltolla, ika bel i mang.

²² Oroï, ar saran a tnan tinsaman tana pa ir sira borbor ka ting na logo ngasna. Pa la otleng ning la tol a pamuk a toltol taum ono, pa bel la lingir a nuknukinla kusun na toltol ane Jesabel, ar saran a rakrakai a kankan tetek la.

²³ Par umkol na natnat e Jesabel, sur a tarai a lotu rop lar tasmani mang a tasman a balana tarai pa nuknukinla, par kelesi tetek mulo taktakai arlar ot ana numulo na titol.

²⁴ Ika mulo tingia e Tiatira ning bel mulo mur a asaer ane Jesabel, pa bel mulo mur a ututnala ne di atongi mang a rakrakai a utna na pidik ane Satan, a atongi tamulo mang, bel ar suah ulak tar ta mamahat saot omulo.

²⁵ A asaerla ning mulo ka tong akes tari, mulor tur rakrakai ono tuk ning ar hanot.

26-27 Esining i tur rakrakai pa i tolsot pas a nuknukik tuk ana araropna, ar saran tar a warkurai tana larot a warkurai ning e Tata i saran tari tak, suir warkurai a tarai miting na matanitu rop.

‘Ir warkurai rakrakai la ana bulse na aen, pa ir miren la arlar ning di pagal gingini a kuro ning di toli ana piopap.’ *Buk Song 2:9*

28 Par tabari otleng ana matlai.

29 Esining a talngana kaning, i wakak sur ir longor a warwara ne a Talngan Tabu i atongi tetek a tarai a lotu ting na hananuala.

3

A warwara tetek a tarai a lotu tumo e Sardis

¹ “Ur tumtumus tetek a angelo anuna tarai a lotu tumo e Sardis larne:

Na warwara ne anun esaning i tong mais a Inguna e God pa mais a nangnang.

A tasman anumulo na titol. A tarai la atongi mang mulo laun, ika mulo ka mat.

² Mulor mata, pa mulor arakrakai anumulo na wakak a toltol ning i mang ir mat, anasa a oroi i mang, anumulo na titol belot i kidol na matana God anuki.

³ I maining mulor nuk pas a asaer ning mulo ka kibas pasi pa mulo ka longor tari, mulor longor ono pa mulor lingir a nuknukimulo. Ika ning bel mulor mata, ar hanot tetek mulo arlar

2:26-27: 2:26-27 Buk Song 2:8-9 2:28: 2:28 Tatatai 22:16 3:1: 3:1 Tatatai 1:4, 16 3:3: 3:3 Matiu 24:43-44; Tatatai 2:5; 16:15; 1 Tesalonika 5:2

ana bokona hanla salanigo tamulo, pa lar atong puasai mang iau a maris mulo.

¹⁰ Ning a tnan larlar ir hanot te na rakrakan hanua rop, suir lar la ning la kes te lapiu, ar tai alar mulo ana pukakiar ning, anasa mulo mur anak a warkurai sur mulor tur rakrakai ning mulo kilang a kankan.

¹¹ Milau kama ar hanot. Mulor tur rakrakai ana tortorot, sur gong tik i kibas anumulo a arlou, ning e God ir saran tari tamulo, larning di saran tar a arlou tan tik ning i tolsot pas a arsoxsok.

¹² Esining i tur rakrakai tuk ana araropna, ar aturi sur i a pos a rumai artabar anuna God anuki, pa bel ir purum ulak mitingia. Par tumus a risan a God anuki ono, pa risan a hanua anuna God anuki, a tona Jerusalem, ning ir han purum misaot na langit tana God anuki. Par tumus tar otleng a tona risak ono.

¹³ Esining a talngana kaning, i wakak sur ir longor a warwara ne a Talngan Tabu i atongi tetek a tarai a lotu ting na hananuala.

A warwara tetek a tarai a lotu tumo e Laodisia

¹⁴ “Ur tumtumus tetek a angelo anuna tarai a lotu tumo e Laodisia larne:

Na warwara ne anun esaning di atongi Amen, a tena warwara talapor ane God ning i momol kol, pa kama akakes ane God.

¹⁵ A tasman anumulo na titol. Bel mulo kotkoto pa bel mulo laplapang otleng. A mang sur mulor kotkoto o mulor laplapang.

¹⁶ Ar muraen sen mulo kusun a pahak, anasa mulo laplapang siklik ka, bel mulo laplapang momol, pa bel mulo kotkoto.

¹⁷ Mulo atongi mang, 'Mila gongon, mila suah taum a galis a gongon pa bel mila kapan sur ta utna.' Ika bel mulo oroi lalani mang anumulo a keskes bel i wakak, mulo pot na marmaris, mulo kapan, mulo kut pa mulo mengere.

¹⁸ A nangan mulo ana nuknukla ne: Mulor lou a gol tak, ning di ka tun totoh tari ana iah, sur mulor gongon ono. Pa mulor lou otleng a kokok a kaen pa mulor pipisi, sur mulor pipis alar mulo sur gong mulo meme, anasa mulo mengere ka. Pa mulor lou a marasin tak pa mulor suahi ting na naur a kalso matamulo, sur mulor tai wakak.

¹⁹ La ning a maris la, a sira saran a rakrakai a warwara tetek la, pa a sira atostos la. I maining mulor rakrakai sur mulor mur a tostos a toltol, pa mulor lingir a nuknukimulo.

²⁰ Oroi i, a tur ting na taman pa a pinpidir. Ning tik ir longor a elngek pa ir sapang a taman, ar kas teteki, pa ar hangan taum onoi, pa ai, ir hangan taum hok.

²¹ Esining i tur rakrakai tuk ana araropna, ar malmaling sur miar kes taum ana nuk a

keskes a king, larning a tur rakrakai tuk ana araropna, pa a kes taum oe Tata ting na nuna keskes a king.

²² Esining a talngana kaning, i wakak sur ir longor a warwara ne a Talngan Tabu i atongi tetek a tarai a lotu ting na hananuala.”

4

A lotu saot na langit

¹ Lamur a tai, a oroi pas a taman i sapang saot na langit. Pa elngena esaning a longor nigon tari, ning i warwara tetek iau arlar ana tawuru, i atongi mang, “Han kas ute, ar asangan tar u ana saning ir hanot lamur.”

² Ono otning a bukus ana Talngan Tabu. Pa salanigo tak, a oroi a keskes a king saot na langit, pa takai i kes tar ono.

³ Pa esaning i kes tar ana keskes a king, i talapor arlar ana naur a hat ning a matandiau i abit, ning di atong diau ana jasper pa karnelian*. Pa gogol i tur talilis pas a keskes a king, i tatatai arlar ana wakak a hat ning di atongi a emeral†.

⁴ Pa naur a bonot pa pisir diat a keskes a king la tur talilis a keskes a king ning, pa naur a bonot pa pisir diat a ningnigo kaning la kes tar tingia. La mermer ana kokok a kaenla, pa ting na pukulunla la suah na kukuh a king ning di toli ana gol.

4:1: 4:1 Tatatai 1:1, 10 **4:2: 4:2** Aisaia 6:1 **4:3: 4:3** Esekiel 1:28 * **4:3: 4:3** A karnelian a kubar a hat. † **4:3: 4:3** A emeral a girin a hat. **4:4: 4:4** Tatatai 3:18

⁵ A pil, a pungpugur pa unga, ditol hanot miting na keskes a king. Pa salanigo na keskes a king, mais a lam kaning la irnga. La ning mais a inguna e God.

⁶ Ting otleng napir a keskes a king, ning a utna i tatatai arlar ana tasi ning di toli ana galas, pa i talapor kol.

Ting na arpotor, diat a lalaun a akakes la tur talilis a keskes a king, a kalso matanla i bonot arop a palaonla, salanigo pa tumo lamur.

⁷ A ningnigo na lalaun a akakes i arlar ana laion, a munaurna i arlar ana bulumakau, a munatolna a patarna i arlar ana barsan, pa mundiatna i arlar ana manigulai ning i rowoi.

⁸ Diat a lalaun a akakes ne, taktakai onla, diono na dehelna, pa kalso matanla i bonot arop a palaonla, pa ting nahai a dehelinla otleng. Ana moromla pa kabakiarla, bel la manah ana atong a warwarā mang,

“I totoh, i totoh, i totoh,
A Leklek e God, esaning i rakrakai kol,
esaning i laun nigo, i laun onone pa ir hanot lamur.”

⁹ Esaning i kes ana keskes a king, ning i laun tikin bel ir rarop, diat a lalaun a akakes ne la aitna pasi, la hanrawai i pa la atong wakak teteki. Bolbolos ning la toli larne,

¹⁰ naur a bonot pa pisir diat a ningnigo otleng la punga hanrawai na matana esaning i kes ana keskes a king, ning i laun tikin bel ir rarop, pa la

4:5: 4:5 Esekiel 1:13; Sekaraia 4:2; Tatatai 1:4; 8:5; 11:19; 16:18

4:6: 4:6 Esekiel 1:5-10, 22; 10:14 **4:8: 4:8** Aisaia 6:2, 3; Esekiel 1:18; 10:12 **4:10: 4:10** Tatatai 7:10, 15; 19:4

lotu teteki. La suah tar anunla na kukuh a king
 salanigo na keskes a king pa la atongi mang,
 11 “Anumila a Leklek pa numila a God,
 i tostos kol sur dir aitna pas u pa dir
 hanrawai u,
 pa i tostos kol ning ur tong akes a rakrakai,
 anasa u, u akes a ututnala rop.
 U akes la ana nuknukim ot,
 pa la laun ka hom.”

5

A buk ning di ka hin tari pa Nat a Sipsip

¹ Lamur a oroi a buk ting na sot a kuna
 esaning i kes ting na keskes a king. A buk ning di
 ka hin tari, di ka tumtumus rop tar ana naur a
 risna, pa di ka bulit alar tari ana mais a bulit.

² Pa a oroi a rakrakai a angelo i deke ana tnan
 elngena mang, “Esi i tostos suir pilik sen mais a
 bulit ne mite na buk, pa ir paki?”

³ Bel tik saot na langit, pa te lapiu, pa tingui na
 piu i tolsot suir pak a buk ning, o ir oroi i.

⁴ A tangis kol iau, anasa bel tik i tostos suir pak
 a buk ning, o ir oroi a tumtumus tingui na tinine.

⁵ Ning a ningnigo i atongi tak mang, “Gong u
 tangis! Oro i, a laion anuna mangis a tarai Juda,
 a wakir e Dewit, ka tolsot pas a hiruala anunai. I
 tolsot suir pilik sen mais a bulit pa ir pak a buk
 ning.”

⁶ Lamur a oroi a Nat a Sipsip, i tai arlar larning
 di ka umkol tari, i tur napir a keskes a king, pa

5:1: 5:1 Aisaia 29:11; Esekiel 2:9-10 **5:5: 5:5** Stat 49:9; Aisaia
 11:1, 10; Tatatai 22:16 **5:6: 5:6** Sekaraia 4:10; Jon 1:36; Tatatai
 13:8

diat a lalaun a akakes taum ana ningnigola la tur talilis pasi. A Nat a Sipsip ning, mais a komna, pa mais a matana. La ning, mais a inguna e God, ning i sune sen la ute na rakrakan hanua rop.

⁷ A Nat a Sipsip i han pa i kibas pas a buk miting na sot a kuna esaning i kes ting na keskes a king.

⁸ Ning ka kibas pas a buk ning, diat a lalaun a akakes pa naur a bonot pa pisir diat a ningnigo, la punga hanrawai tar salanigo tana Nat a Sipsip. La rop la tong taktakai a utna lar a gita pa taktakai a besen ning di toli ana gol. A besenla ning, la bukus ana paura di tuni pa sasawana i toboh wakak, ning di atongi a insens. La ning, a niaringla anuna tarai ane God.

⁹ Pa la saken a tona saksak larne,
 “U ot u tostos sur ur kibas pas a buk pa ur pilik
 sen na bulit kusuni,
 anasa di umkol u,
 pa u lou lingir pas a tarai tetek e God ana
 sulukim,
 a tarai miting na mangis a tarai rop, pa
 miting na urmatana ngas a warwarala
 rop, pa miting na hananuala rop pa
 miting na matanitula rop.

¹⁰ U ka akes tar la sur lar warkurai taum hom,
 pa la na tena artabar tetek anundala a God,
 pa lar warkurai te na rakrakan hanua.”

¹¹ Lamur a tai pa a longor a elngen a galis a angelo ning la tur talilis pas a keskes a king pa

5:8: 5:8 Tatatai 8:3-4; Buk Song 141:2 **5:9: 5:9** Buk Song 33:3; 40:3; 96:1; 98:1 **5:10: 5:10** Kisim Bek 19:6; Aisaia 61:6; Tatatai 1:6; 20:6 **5:11: 5:11** Daniel 7:10; Hibrui 12:22

diat a lalaun a akakes pa ningnigola. A angelola la galis kol, bel tik ir was sot pas la.

¹² La saksak ana tnan elngenla larne,
 “I tostos kol sur a Nat a Sipsip ning di umkol tari ir kibas a warkurai, a galis a gongon, a tastamai pa rakrakai.

Pa i tostos kol ning dir hanrawai i, dir aitna pasi pa dir atong aleklek pasi!”

¹³ Pa a longor na elngen a akakes rop saot na langit pa te na rakrakan hanua pa tingui na piu pa salatasi, a ututnala rop ning di akes la, la saksak larne,

“Dalar rakan aleklek pas esaning i kes ting na keskes a king,
 pa Nat a Sipsip,
 dalar hanrawai diau pa dalar aitna pas diau. Dia tong akes a rakrakai,
 bel ir rarop.”

¹⁴ Pa diat a lalaun a akakes la atongi mang, “Amen,” pa na ningnigo la punga hanrawai pa la lotu.

6

A Nat a Sipsip i pilik sen na bulit

¹ A oroi ning a Nat a Sipsip i pilik sen a ningnigo na bulit miting na mais a bulit kaning na buk. A longor ning a halin diat a lalaun a akakes i arkabah ana elngena i arlar ana pungpugur mang, “Han ute!”

² Pa ning a tai, a oroi pas a kokok a hos salanigo tak. Pa esaning i kes saot ono, i tong pas

a kaba raurau a harum, pa di saran tar a kukuh na king tana. I han ana rakrakai suir tolsot pas a harum.

³ Ning a Nat a Sipsip i pilik sen a munaur a bulit, a longor a munaur a lalaun a akakes i atongi mang, “Han ute!”

⁴ Ning a hos maleng i hanot i kubar. Pa esaning i kes saot ono di saran tar a rakrakai tana suir kibas sen a balmolmol mite na rakrakan hanua, pa tarai lar umkol artalai la. Pa di saran tar a tnan liwan a harum tana.

⁵ Ning a Nat a Sipsip i pilik sen a munatol a bulit, a longor a munatol a lalaun a akakes i atongi mang, “Han ute!” Ning a tai, a oroi pas a mutmut a hos salanigo tak. Pa esaning i kes saot ono, ting na kuna i tong pas a sikel.

⁶ Pa a longor takai a utna i arlar ana elngen takai na arpotor in diat a lalaun a akakes i atongi mang, “A matana utna ir abit kol. Dir lou takai a kilogrem a wit ana takai a denaria,* pa dir lou natol a kilogrem a bali† otleng ana takai a denaria. Ika gong di alaulau naur a utna ne: a wain pa wel a oliw.”

⁷ Ning a Nat a Sipsip i pilik sen a mundiat a bulit, a longor a elngen a mundiat a lalaun a akakes i atongi mang, “Han ute!”

⁸ Ning a tai, a oroi pas a kubus a hos salanigo tak. Pa esaning i kes saot ono a risana A Minat. Pa e Hedes, a hanua anunla ning la mat, i mur

* **6:6: 6:6** Takai a denaria i arlar ana arlou anuna tik ta barsan ana ning a pukakiar a titol. † **6:6: 6:6** Naur a ngas a ulai ning di tol a palawa ana wandiau, a wit pa bali. A wit i wakak tana bali.

6:8: 6:8 Jeremaia 15:1-3; Esekiel 5:12, 17; 14:21

milau i. Di saran tar a warkurai tandiau sur diar umkol ning a kunum a tarai miting na diat a kunum a tarai mite na rakrakan hanua. Diar umkol la ana liwan a harum, pa munurak, pa na laulau a tinsaman, pa na rokoio na inagoi otleng mite na rakrakan hanua.

⁹ Ning a Nat a Sipsip i pilik sen a mundilima na bulit, a oroi a ingunla ning di ka umkol tar la, anasa la mur sot pas a warwara ane God pa la warwara talapor ono. A oroi la tinglain na logo na tun artabar.

¹⁰ La arkabah ana tnan elngenla mange, “Leklek, u a King, u totoh pa u momol. Nangse ma ur warkurai la ning la kes te na rakrakan hanua pa ur keles a sulukimila tetek la?”

¹¹ Lamur di saran tar taktakai a kokok a kaen tanla rop. Pa di atai la mang, lar kes siklik ulak pas, tuk ning dir umkol la otleng ning la titol taum onla ana Wakak a Warwara, pa na tastasinla ana tortorot. Dir umkol la arlar onla ning di ka umkol nigon tar la, tuk a wawasinla ir sot.

¹² A oroi ning a Nat a Sipsip i pilik sen a mundiono na bulit. A tnan mamais i gulgule rakrakai kol, a kamis i mutmut arlar ana mutmut a kaen ning di toli ana hih a meme, pa kalang i kubar arlar ana suluk.

¹³ Pa na nangnang saot na solsol la punga purum te na rakrakan hanua, arlar ana pirau a wana figla, ning a rakrakai a wuwu i wus la, pa la punga purum.

14 Pa bakut otleng i rorom ka arlar ana mat ning di hini. Pa na mangir rop pa na lolo rop la karai pas kusun a ngasinla.

15 A kingla mite na rakrakan hanua pa na ningnigo, na ningnigo anuna tena harumla, la ning la leklek ana gongonla, na tena rakrakai, na tena titol oros pa la ning bel na tena titol oros, la rop la parau ting na kulamla, pa ting na arpotor a tatatnan hatat saot na mangirla.

16 Pa la woiwoi tetek na tatatnan hatat pa na mangir mang, “Mulor punga saot omila, pa mulor bunur mila kusun a patarna esaning i kes ting na keskes a king, pa kusun a balakut ana Nat a Sipsip!

17 Anasa anundiau a tnan pukakiar a balakut ka hanot, pa bel tik ir tolsot pas diau.”

7

Di suah tar a akinalang ana ning a mar diat a bonot pa pisir diat a rip miting na tarai Israel

1 Lamur tana, a oroi diat a angelo la tur ting na diat a matana wuwu te na rakrakan hanua. La tong alar pas diat a matana wuwu sur gong la wus a hananuala, pa tasi, pa rakaila.

2 A oroi pas ning a angelo kaleng i hanot miting na matana tobar pa i tong pas a akinalang ane God, esaning i laun. I arkabah ana tnan elngena tetek diat a angelo ning di ka saran tar a rakrakai tanla sur lar alaulau a hananuala pa tasi.

6:14: 6:14 Tatatai 16:20 **6:15: 6:15** Aisaia 2:10, 19, 21 **6:16:**
6:16 Luk 23:30 **6:17: 6:17** Joel 2:11; Malakai 3:2 **7:1: 7:1**
 Jeremaia 49:36; Daniel 7:2

³ I atongi lerne, “Gong mulo alaulau a hananuala pa tasi pa rakaila, tuk ning milar suah tar a akinalang ting na patar a tena titol orosla ane God anundalai.”

⁴ Pa a longor a wawasinla ning di ka aslang tar la. La ning a mar diat a bonot pa pisir diat a rip miting na mangis a tarai Israel rop.

⁵ Di ka aslang tar ning a bonot pa pisir naur a rip miting na mangis a tarai Juda, ning a bonot pa pisir naur a rip miting na mangis a tarai Ruben, ning a bonot pa pisir naur a rip miting na mangis a tarai Gat,

⁶ ning a bonot pa pisir naur a rip miting na mangis a tarai Aser, ning a bonot pa pisir naur a rip miting na mangis a tarai Naptali, ning a bonot pa pisir naur a rip miting na mangis a tarai Manase,

⁷ ning a bonot pa pisir naur a rip miting na mangis a tarai Simion, ning a bonot pa pisir naur a rip miting na mangis a tarai Liwai, ning a bonot pa pisir naur a rip miting na mangis a tarai Isakar,

⁸ ning a bonot pa pisir naur a rip miting na mangis a tarai Sebulon, ning a bonot pa pisir naur a rip miting na mangis a tarai Josep, ning a bonot pa pisir naur a rip miting na mangis a tarai Benjamin.

A kunum a tarai la lotu tetek e God

⁹ Lamur tana, a tai, pa a oroi pas a tnan kunum a tarai ning bel tik ir was sot pas la. A tarai miting na matanitula rop, pa miting na mangis a taraila rop, pa miting na hananuala rop pa miting na urmatana ngas a warwarala rop, la tur salanigo na keskes a king pa Nat a Sipsip. La mermer ana kokok a kaenla, pa la tong a paka baibaila.

¹⁰ La arkabah ona tnan elngenla mange, “E God anundalai, esaning i kes ting na keskes a king pa Nat a Sipsip, dia alaun pas dala.”

¹¹ Na angelo rop la tur talilis pas a keskes a king pa na ningnigo pa diat a lalaun a akakes. La punga hanrawai ana patarinla ting na piu salanigo na keskes a king, pa la lotu tetek e God,

¹² la atongi mang, “Amen!

Dalar rakan aleklek pas e God anundalai, dalar aitna pasi, dalar atong wakak teteki, pa dalar hanrawai i.

I tong akes a tastasmai, pa warkurai pa rakrakai, bel ir rarop.

Amen!”

¹³ Pa takai a hal a ningnigola i deken iau mang, “Esi la ne la mermer ana kokok a kaenla? Pa la han mitahaia?”

¹⁴ Pa kelesi mang, “Leklek, u ot u tasmani.” Pa i atongi tak mang, “La ne, la ning la ka laun ot

miting na tnan kankan ning i monong la. La ka gos kokok pas anunla na kaen ana suluk a Nat a Sipsip.

- ¹⁵ Manglarning,
 la tur salanigo na keskes a king ane God,
 la titol teteki ting na nuna rumai artabar
 ana kabakiarla pa moromla.
 Pa esaning i kes ting na keskes a king ir pol alar
 la sur lar kes taum onoi.
- ¹⁶ Bel lar murak,
 pa bel ma lar mos ulak.
 Pa kamis bel ir alaulau la,
 pa bel ta utna otleng ir rang sakan la.
- ¹⁷ Anasa a Nat a Sipsip ning i kes na arpotor a
 keskes a king, ir hanot anunla a tena tai
 alar.
 Ir nigon la sur uting na matmatana malum a
 lalaun.
 Pa e God ir sah sen na lurus matanla rop.”

8

A ararop a bulit

¹ Ning a Nat a Sipsip i pilik sen a ararop a bulit ting na mais a bulit, saot na langit, bel ta warwara pa bel ta agaia ana natol a bonot a minit.

² Pa a oroi mais a angelo ning la sira tur salanigo ta e God, pa di saran tar mais a tawuru* tanla.

7:16: 7:16 Aisaia 49:10 **7:17: 7:17** Buk Song 23:2; Aisaia 25:8;
 Tatatai 21:4 * **8:2: 8:2** A tawuru i tur aslang a biugel.

³ Ning a angelo kaleng i hanot i tur tar napir a logo na tun artabar. I tong pas a besen di toli ana gol, ning di sira tun a insens onoi, a paura ning a sasawana i toboh wakak. Di saran tar a galis a insens ning tana sur ir tuni sur a artabar. I suah taumi ana niaringla ana tarai rop ane God ting na logo na tun artabar ning di toli ana gol, salanigo na keskes a king.

⁴ A sasawan a insens i han usaot taum ana niaringla anuna taraila ane God. A sasawana i kamtur miting na kuna angelo usaot na matana e God.

⁵ Lamur a angelo i kibas pas a besen pa i abukus ulaki ana iah miting na logo na tun artabar, pa i migen purum tari saot na rakrakan hanua. A pungpugur, a unga, a pil pa mamais i hanot.

A angelola la wus a tawurula

⁶ Lamur a mais a angelo ning la tong mais a tawuru la sang sur lar wus la.

⁷ A ningnigo na angelo i wus anuna tawuru, pa kiar a ais i hanot taum ana iah ning di ka tol taman tari ana suluk, pa di migen purum seni saot na rakrakan hanua. Pa i arlar larning di salar a rakrakan hanua pa rakaila rop sur natol a pukna, pa takai a pukna tagun ditol i irnga rop, pa ulaila rop otleng ning la gomo, la irnga rop.

⁸ A munaur a angelo i wus anuna tawuru, pa ning a utna i arlar ana tnan mangir ning i irnga, di migen seni uting latasi. I arlar larning di salar

8:3: 8:3 Tatatai 5:8; Kisim Bek 30:1-3 **8:5: 8:5** Wok Pris 16:12; Kisim Bek 19:16-19; Tatatai 11:19; 16:18 **8:7: 8:7** Kisim Bek 9:23-26; Esekiel 38:22; Joel 2:30

tar a tasi sur natol a pukna, pa takai a pukna tagun ditol i keles sur a suluk.

⁹ I arlar larning di salar tar a akakesla rop ning la laun salatasi sur natol a pukna, pa takai a pukna tagun ditol la mat. Pa i arlar larning di salar tar a sipla rop otleng sur natol a pukna, pa takai a pukna tagun ditol la hirua.

¹⁰ A munatol a angelo i wus anuna tawuru, pa tnan nangnang ning i irnga arlar ana sulu i punga misaot na bakut. I arlar larning di salar tar a malumla rop pa matmatana malum rop sur natol a pukna, pa nangnang ning i punga saot na takai a pukna tagun ditol.

¹¹ A risana nangnang ning di atongi mang Mapak Kol. Pa malum miting na malumla pa matmatana malumla ning a nangnang i punga tar saot onla i mapak kol. Pa galis a tarai ning la gang a malum ning, la mat, anasa a malum ning i mapak kol.

¹² A mundiat a angelo i wus anuna tawuru. Pa i arlar larning di salar tar a Kamis, a kalang pa nangnangla rop sur natol a pukna, pa takai a pukna miting na natol a pukna ning, di dapisi pa i keles sur a mormorom. Takai a pukna miting na natol a pukna miting na morom pa takai a pukna miting na kabakiar otleng, bel ta talapor ono.

¹³ Ning a tai, a longor a manigulai ning i rowoi saot na solsolna i arkabah ana tnan elngena mange, “Ir laulau! Ir laulau! Ir laulau tetek la ning la kes te na rakrakan hanua, anasa ana

natol a mamahat kaleng ir hanot ning ir natol a angelo ditol ir wus anunditol natol a tawuru.”

9

¹ A mundilima na angelo i wus anuna tawuru, pa a oroi a nangnang ning ka punga purum tar misaot na bakut ute na rakrakan hanua. Di saran tar a ki tana, a ki ana tnan tung ning bel ta araropna.

² Ning i sapang a tnan tung, a sasawan i turot mitingia arlar ana sasawan ana tnan iah ning i irnga kol. Pa kamis pa bakut i mormorom ana sasawan miting na tung ning.

³ A mumla la han purum miting na sasawan pa la kes te na rakrakan hanua, pa di saran tar a rakrakai tanla, arlar ana rakrakai ana radamla.

⁴ Di atai la mang gong la alaulau a ulai te na rakrakan hanua, o a rakaila otleng. Lar alaulau a taraila ka ning bel ta akinalang ane God ting na patarinla.

⁵ Ika bel di saran tar a rakrakai tanla sur lar umkol la, sur lar akadik la dilima na kalang ka. A kankan ning a tarai lar kilangi, i arlar larning a radam i pisi a tarai.

⁶ Ana pukakiarla ning, a galis a tarai lar tai sur a minat, ika bel lar mat. Lar mang sur lar mat, ika a minat ir alah la ka.

⁷ A mumla ning, la tai arlar ana hosla ning di ka sang tar la sur a harum. Ting na pukulunla a ututnala i arlar ana kukuh a king ning i tatatai

9:1: 9:1 Tatatai 20:1 **9:2: 9:2** Stat 19:28; Joel 2:2, 10; Kisim Bek 10:12-15 **9:4: 9:4** Tatatai 7:3 **9:6: 9:6** Jop 3:21; Jeremaia 8:3
9:7: 9:7 Joel 2:4

lar a gol, pa patarinla i arlar ana patar a momolna.

⁸ A hih a pukulunla i barah arlar ana hih a gurarala, pa ngesenla i arlar ana ngesen a laion.

⁹ Di suah alar na malwasinla ana ututnala ning i tai arlar ana aen. A unga na dehelinla i arlar ana unga na galis a hos pa galis a karis la dun kapit sur a harum.

¹⁰ Na mukmukinla i pispisi arlar ana radam. Pa rakrakai i kes ting na mukmukinla sur lar alaulau a tarai ana dilima na kalang.

¹¹ A angelo miting na tnan tung ning bel ta araropna, esaning anunla a king. Di atong a risana ana warwara Hibu Abadon, pa ana warwara Grik Apolion.*

¹² Ka rop a ningnigo na kankan. Naur a kankan kaning ot ir hanot.

¹³ A mundiono na angelo i wus anuna tawuru, pa a longor a elngen takai i hanot miting na diat a utna ning i tatatai lar diat a kom ting na logo na tun artabar. A logo ning di toli ana gol, pa i tur salanigo ta e God.

¹⁴ Pa i atai a mundiono na angelo ning i tong anuna tawuru larne, “Ur pak sen diat a angelo ning di dot akes tar la ting na tnan malum Iupretis.”

¹⁵ Pa i pak sen diat a angelo ning, sur lar umkol takai a kunum a tarai miting na natol a kunum. Diat a angelo ning e God ka sang tar la

9:8: 9:8 Joel 1:6 **9:9: 9:9** Joel 2:5 * **9:11: 9:11** Abadon pa Apolion a kamkamna mang a “Tena alaulau a tarai.” **9:15: 9:15** Tatatai 8:7-12

sur a awa ning, pa pukakiar ning, pa kalang ning pa rau ning.

¹⁶ A wawas ana tarai a harum ning la kes ana hosla, la arlar ana naur a mar a milian (200,000,000) rop. A longori larné.

¹⁷ Ana nuk a tatatai a oroi na hos pa la ning la kes saot onla. Na utna ning la suah alar na malwasinla ono i kubar arlar ana iah, i bulu pa i sinang arlar ana salfa. Pa pukul a hosla ning i arlar ana pukul a laionla. A sasawan, a iah pa salfa ditol purum miting na pahanla.

¹⁸ A tarai rop miting na natol a kunum, takai a kunum onla, i hirua ana sasawan, a iah pa salfa ning ditol purum miting na pahanla.

¹⁹ A rakrakai ana hosla i kes ting na pahanla pa na mukmukinla. Anasa na mukmukinla i arlar ana soila, pa pukul a soila la akadik a tarai.

²⁰ Pa tarai ning a laulau a akadikla ne bel i umkol la, bel la lingir a nuknukinla kusun a manarla ning la toli ona kunla. Bel la manah ana lotu tetek a motla pa na manarla na gol, pa silwa, pa bras, pa hat, pa na rakaila. Na manar ning, bel la sira tai, bel la sira longor pa bel la sira han.

²¹ Pa tarai ning a laulau a akadikla ne bel i umkol la, bel la lingir a nuknukinla otleng ana umkol a tarai, a wah, na pamuk a toltol pa na kinkinau.

10

A angelo pa natar a buk ning di ka hin tari

9:20: 9:20 Tatatai 16:9, 11; Buk Song 115:4-7; 135:15-17; Daniel 5:23

¹ Lamur a oroi pas ning a rakrakai a angelo maleng i han purum amon misaot na langit. I mermer ana bakut, pa gogol i kes lao tar saot na pukulna. A patarna i arlar ana Kamis, pa naur a hana i tatatai arlar ana naur a pos ning i irnga.

² I tong pas a natar a buk ning di ka hin tari, kaning i sapang tar ting na kuna. I atur tar a sot a hana salatasi, pa kair a hana ting na piu.

³ Pa i kukuk ana tnan elngena arlar ana elngen a laion. Ning i agaia, a elngen mais a pungpugur la warwara.

⁴ Ning mais a pungpugur la ka warwara rop, a mang suar tumtumus, ika a longor a elngen takai misaot na langit i atongi mang, “Gong u tumus akes a warwarala ning mais a pungpugur la ka atong tari, ur pidik alari ka.”

⁵ Pa angelo ning a oroi tari ning i tur tar salatasi pa ting na piu, i tuslan kas a sot a kuna usaot na langit.

⁶ Pa i lele tar o esaning i laun tikin, bel ir rarop, ning i akes a bakut pa ututnala rop ning la kaning ia, pa rakrakan hanua pa ututnala rop ning la kaning ia, pa tasi pa ututnala rop ning kaning ia, pa i atongi mang, “Bel ma e God ir harnanai ulak.

⁷ Ana pukakiarla ning a ararop a angelo miting na mais a angelo ir mang suir wus anuna tawuru, dir tolsot pas a utna na pidik anun e God, arlar ono ning ka atong tari tana nuna tena titol orosla, a propetla.”

⁸ Pa elngen takai, ning ia ka longor tari misaot na langit, i atong ulaki tak larne, “Ur han pa ur kibas pas a buk, ning kaning i sapang tar ting na kuna angelo ning i tur tar salatasi pa ting na piu.”

⁹ Pa a han tetek a angelo pa a nunungi suir saran tar a natar a buk ning tak. Pa i atongi tak mang, “Kibasi, pa ur ieni. Ir amapak a balam, ika a paham ir namnamin arlar ana polo na tatos.”

¹⁰ Pa a kibas pas a natar a buk ning kusun a kuna angelo, pa a ieni. Pa pahak i namnamin arlar ana polo na tatos. Ika, ning a konomi, i amapak a balak.

¹¹ Pa di atongi tak mang, “Ur warwara na propet ulak ana galis a tarai ting na hananuala, a galis a tarai miting na matanitula, a galis a tarai miting na urmatana ngas a warwarala pa galis a king.”

11

Naur a momol a tena warwara talapor

¹ Di saran tar a por tak, i arlar ana rakai di sira mak onoi pa di atai iau mang, “Ur han pa ur mak a rumai artabar ane God, pa logo na tun artabar, pa ur was la ning la loflotu tingia.

² Ika ur noren sen a pukna tumo lapiu na rumai artabar, gong u mak tari. Anasa di ka saran tari tetek a tarai ning bel a tarai ane God, pa lar pas dur a totoh a hanua ane God arlar ana diat a bonot pa pisir naur a kalang.

³ Par saran tar a rakrakai tan anuk naur a tena warwara talapor hok, diar mermer ana kaen a tobo pa diar warwara na propet pas ana takai a rip pa naur a mar pa diono na bonot (1,260) a pukakiar.”

⁴ Naur a tena warwara talapor ne, dia naur a rakai a oliw pa naur a turtur a lam, ning dia tur na matana Leklek anuna rakrakan hanua.

⁵ Ning tik i mang suir alaulau diau, a iah ir hanot miting na pahandiau pa ir ien sen anundiau na hirua. Ning tik i mang suir alaulau diau, ir mat larot ning.

⁶ Naur a barsan ne dia tong akes a rakrakai sur diar sairas a bakut, sur gong a kiar i punga ana taim ning dia warwara na propet. Dia tong akes otleng a rakrakai sur diar keles a malum sur a suluk, pa diar dapis a rakrakan hanua ana urmatana ngas a akadik rop ana taimla ning dia nuki.

⁷ Ning dia ka arop sen anundiau a warwara talapor, a rokoio na inagoi ir han kas kusun a tnan tung ning bel al araropna. Ir harum taum ondiau, pa ir tolsot pas diau pa ir umkol diau.

⁸ Pa minatindiau ir borbor ka ting na ngas ana tnan hanua di atong larlari oe Sodom pa e Ijip, a hanua ning di sai ahat otleng anundiau a Leklek ia.

⁹ Pa tarai miting na hananuala rop, pa miting na mangis a tarai rop, pa miting na urmatana ngas a warwarala rop, pa miting na matanitula

11:4: 11:4 Sekaraia 4:3, 11-14 **11:5: 11:5** 2 Samuel 22:9; Buk Song 97:3 **11:6: 11:6** 1 King 17:1; Kisim Bek 7:17-20; 1 Samuel 4:8 **11:7: 11:7** Daniel 7:21; Tatatai 12:17; 13:7; 17:8 **11:8: 11:8** Luk 13:34

rop lar oroi a minatindiau ana natol a pukakiar pa takai a tuka Kamis pa bel lar longor sur dir por diau.

¹⁰ Pa taraila mite na rakrakan hanua lar gas ka ondiau, lar asangan anunla na gasgas ona artabar tetek la artalai, anasa naur a propet ne dia akadik a tarai te na rakrakan hanua.

¹¹ Ika lamur tana natol a pukakiar pa takai a tuka Kamis, e God i wus kas tar a wuwu na lalaun ondiau. Pa dia laun pa dia tur, pa tnan matmataut i kibas la ning la oroi diau.

¹² Pa dia longor a tnan elngen takai misaot na langit i atai diau mang, “Mu han kas ute.” Pa dia han kas ana bakut usaot na langit, pa nundiau a hiruala la oroi sen diau.

¹³ Ono otning, a tnan mamais i hanot. Pa takai a pukna miting na tnan hanua ning i tarege, pa siuk a pukna bel. Pa mais a rip a tarai la mat, pa la ning la laun la matmataut kol, pa la atong leklek pas e God ning i kes saot na langit.

¹⁴ Munaur a akadik ka rop. Pa takai akadik ulak milau ir hanot.

A ararop a tawuru

¹⁵ A ararop a angelo miting na mais a angelo, i wus anuna tawuru, pa galis a tnan elngena tarai saot na langit la atongi mang,

“A matanitu ana rakrakan hanua ka keles sur a matanitu anuna Leklek anundalai, pa anuna Karisito anunai.

Ir kes na king tikin, bel ir rarop.”

11:11: 11:11 Esekiel 37:5, 10 **11:12:** 11:12 2 King 2:11 **11:13:**
11:13 Tatatai 6:12; 16:18 **11:14:** 11:14 Tatatai 9:12 **11:15:**
11:15 Kisim Bek 15:18; Buk Song 10:16; Daniel 2:44; 7:14

16 Naur a bonot pa pisir diat a ningnigo, ning la kes ting na anunla na keskes a king salanigo ta e God, la punga hanrawai ona patarinla ting na piu, pa la lotu tetek e God.

17 La atongi mang,
 “Mila atong wakak tetek u a Leklek e God ning u rakrakai kol,
 u laun nigo pa u laun onone,
 anasa u ka kugas pas a tnan rakrakaim
 pa u ka turpasi sur ur kes ting na keskes a king pa ur warkurai.

18 Na matanitu masik la balakut,
 pa anum a balakut otleng ka hanot.
 A taim ka hanot sur ur warkurai la ning la mat,
 pa ur saran a arlou tetek anum na tena titol oros, a propetla
 pa anum na tarai, pa la ning la hanrawai a risam,
 la ning bel al risanla pa la ning la leklek,
 pa ur kamar sen la ning la alaulau a rakrakan hanua.”

19 Lamur a rumai artabar ane God saot na langit i sapang, pa ting na rumai artabar anunai, di oroi anuna bok a kunubus. Pa pil, a unga, a pungpugur, a mamais, pa tnan kiar a ais i hanot.

12

A hane pa dregon

¹ A tnan akinalang i hanot saot na langit. Ning a hane i mermer ana Kamis, pa kalang kaning i

kes ting nahai naur a hana, pa saot na pukulna, a kukuh a king, ning di toli ana ning a bonot pa pisir naur a nangnang.

² A hane ne i tianan, pa i woiwoi ana tnan kankan, anasa milau ir agon.

³ Ning a akinalang maleng i hanot saot na langit. Oroi, a tnan dregon, a palaona i kubar, mais a pukulna, ning a bonot a komna, pa mais a kukuh a king kaning na mais a pukulna.

⁴ A mukmukna i surupu purum sen a galis a nangnang misaot na bakut pa i migen purum sen la ute lapiu. I arlar larning di salar tar a nangnangla sur natol a pukna pa ning a pukna tagun ditol la punga ute lapiu. Pa dregon i tur tar salanigo tana hane ning i pele na agon, sur ono otning ir konom e natnalik ning ir agon seni.

⁵ Pa i agon pas a kaklik barsan, esaning ir warkurai rakrakai na tarai miting na matanitu rop ana bulse na aen. Pa di kibas kapit pas a kaklik usaot tetek e God, pa uting na nuna keskes a king.

⁶ Pa hane ning i liu uting na hanua bel, sur uting na pukna ning e God ka sang tari, sur dir tai alari arlar ana takai a rip naur a mar pa diono na bonot (1,260) a pukakiar.

⁷ La tur na harum saot na langit. E Maikel pa nuna angelola la harum taum ana dregon, pa dregon pa nuna angelola otleng la keles la.

⁸ La tolsot pas a dregon, pa bel ulak ma ta pukna anuna dregon pa nuna angelola saot na

langit.

⁹ Di migen purum sen a tnan dregon, a soi tagun nating, ning di atongi a tena artitui, pa e Satan, esaning i ben rongon a rakrakan hanua rop. Di migen purumi taum ana nuna angelola ute lapiu.

¹⁰ Pa a longor a tnan elngen takai saot na langit i atongi mang,
 “Onone a God anundala ka alaun pas a tarai, i asangan a rakrakaina, pa anuna matanitu ka hanot,
 pa warkurai anuna Karisito anunai ka hanot.

Anasa a tena artitui ning i sira tiu na tastasindala,
 esaning i sira tiu la na matana e God ana kabakiarla pa moromla,
 di ka migen purum seni.

¹¹ Na tastasindala la ka tolsot pasi ana suluk a Nat a Sipsip pa ana nunla na warwara talapor.
 Bel la mangan alar anunla a lalaun kusun a minat.

¹² I maining, a langit pa mulo ning mulo kes tingia,
 mulor gas.
 Ika ir laulau tetek a rakrakan hanua pa tasi otleng,
 anasa a tena artitui ka han purum tar tetek mu!

A balana i kut kol,

anasa i tasmani mang bel ma i bongnani.”

¹³ Ning a dregon i tasmani mang di ka migen purum seni ute na rakrakan hanua, i lu a hane ning ka agon tar a kaklik barsan.

¹⁴ Di saran tar naur a dehel a tnan manigulai tana hane ning, suir rowoi taum ono sur a pukna ning e God ka sang tari saot na hanua bel, sur dir tai alari kusun a soi, arlar ana natol a rau pa tukna.

¹⁵ A soi i lewe sen a malum miting na pahana, arlar ana malum, suir los sen a hane ning.

¹⁶ Ika a piu i nangan a hane ning, i panganga pa i konom a malum ning a dregon i lewe seni.

¹⁷ Pa dregon i balakut kol tetek a hane ning, pa i han suir harum taum ana dingla na natnatna a hane otleng ning. La ning la sira longor ana warkurai ane God, pa la sira mur a warwara talapor oe Iesu.

¹⁸ Pa dregon i tur tar kama tumo latasi.

13

A rokoio na inagoi i burak ot miting latasi

¹ Lamur a oroi pas a rokoio na inagoi i burak ot miting latasi. Takai a bonot a komna, pa mais a pukulna, pa takai a bonot a kukuh a king i kes saot na komna. Pa ting na taktakai pukulna, di ka tumus tar a risana ning i atong saksakan e God onoi.

² Pa rokoio na inagoi ning a oroi i arlar ana lepat,* ika naur a hana i arlar ana naur a hana be,† pa pahana i arlar ana pahana laion. A dregon ning, i saran tar a rakrakaina, pa nuna keskes a king, pa nuna tnan warkurai tetek a rokoio na inagoi.

³ Takai a pukul a rokoio na inagoi i tatatai larning di ka umkol tari, ika a masik a minat ning, ka mah. Pa rakrakan hanua rop la kulkulan, pa la mur a rokoio na inagoi ning.

⁴ Pa tarai la lotu tetek a dregon, anasa ka saran tar a warkurai tetek a rokoio na inagoi. Pa la lotu otleng tetek a rokoio na inagoi, pa la atongi mang, “Bel tik i arlar ana rokoio na inagoi ne. Bel tik i tolsot sur ir umi.”

⁵ Di malmaling tar a rokoio na inagoi suir atong a warwarala na iaunan pa warwarala ning ir anan e God ono, pa suir warkurai diat a bonot pa pisir naur a kalang.

⁶ I sapang a pahana sur ir anan e God, pa ir atong laulau a risana, pa pukna ning i kes ia pa la ning la kes saot na langit.

⁷ Di saran tar a rakrakai tana suir harum taum ana tarai ane God, pa ir tolsot pas la. Di saran tar a rakrakai tana sur ir warkurai a tarai miting na mangis a tarai rop, pa miting na hananuala rop, pa miting na urmatana ngas a warwarala rop, pa miting na matanitula rop.

13:2: 13:2 Daniel 7:4-6 * **13:2: 13:2** A lepat, ning a ngas a rokoio na inagoi i arlar ana taiga. Pa hih a palaona i toktok. † **13:2: 13:2** A be, ning a tnan rokoio na inagoi. **13:3: 13:3** Tatatai 17:8 **13:5: 13:5** Daniel 7:8, 25; 11:36; Tatatai 11:2 **13:7: 13:7** Tatatai 11:7

⁸ Pa la rop te na rakrakan hanua, ning a risanla bel i kes ting na buk a lalaun, lar lotu tetek a rokoio na inagoi. A buk a lalaun ne, anuna Nat a Sipsip, ning di umkoli, di ka tumus tari ning e God belot i akes a rakrakan hanua.

⁹ Esining a talngana kaning, i wakak sur ir longor onoi.

¹⁰ Ning e God i malmaling sur tik ir karabus, ir karabus ot.

Ning i malmaling sur dir umkol tik ana liwan a harum, dir umkoli ot onoi.

Manglarning, a tarai ane God lar tur rakrakai pa lar tortorot.

A rokoio na inagoi i pusa ot miting na piu

¹¹ Lamur a oroi ning a rokoio na inagoi maleng i pusa ot miting na piu. Naur a komna i arlar ana kom ana barman a sipsip, ika i warwara lar a dregon.

¹² I titol ana rakrakai rop miting na ningnigo na rokoio na inagoi, suir nangani, sur a rakrakan hanua, pa la ning la kes teia, lar lotu tetek a ningnigo na rokoio na inagoi, ning a masik a minat ning onoi ka mah.

¹³ A rokoio na inagoi ning i pusa ot miting na piu i tol a tatatnan akinalangla. Ning a akinalang ning i toli, i tol otnan a iah misaot na langit ute na rakrakan hanua na matana tarai.

¹⁴ I ben rongon a tarai ning la kes te na rakrakan hanua, anasa ana akinalangla ning i

13:8: 13:8 Buk Song 69:28; Tatatai 17:8; 20:12, 15; 21:27 **13:10:**
13:10 Jeremaia 15:2; 43:11; Tatatai 14:12 **13:13: 13:13** Matiu
 24:24; 1 King 18:24-39; Tatatai 19:20

tolu ana rakrakai ning di saran tari tana suir nangan a ningnigo na rokoio na inagoi onoi. I atai la sur lar atur a manar a ningnigo na rokoio na inagoi sur lar aitna pasi onoi. A ningnigo na rokoio na inagoi, ning nating di so tari ana liwan a harum, ika i laun ulak.

¹⁵ Di saran tar a rakrakai tana suir saran a wuwu na lalaun tana manar a ningnigo na rokoio na inagoi, suir warwara pa ir warkurai sur dir umkol la ning bel la longor sur lar lotu teteki.

¹⁶ Pa munaur a rokoio na inagoi i angongos pas a tarai rop, sur dir suah a akinalang ting na sot a kunla o ting na patarinla. I angongos pas la ning bel al risanla pa la ning la leklek, la ning la leklek ana gongonla pa na kapan a tarai, na tena titol oros, pa la ning bel na tena titol oros.

¹⁷ Bel tik ir tolsot sur ir lolou pa ir siusiurai, ning bel ta akinalang kaning onoi. A akinalang ning a risana a rokoio na inagoi pa wawas ana risana.

¹⁸ Esining i tastasmai ir talapor wakak ana utna ne. Ir was taman a wawas ana rokoio na inagoi, anasa a wawas ana barsan. Anuna wawas ne diono na mar diono na bonot pa pisir diono (666).

14

A Nat a Sipsip pa takai a mar diat a bonot pa pisir diat a rip a tarai

¹ Lamur a tai, pa a oroi pas a Nat a Sipsip i tur saot na mangir Saion taum ana takai a mar diat

a bonot pa pisir diat a rip (144,000) a tarai, la ning di ka tumus tar a risan a Nat a Sipsip pa risana e Tamana otleng ting na patarinla.

² Pa a longor a tnan unga misaot na langit i arlar ana unga na malum ning i naro, pa i arlar ana rakrakai a pungpugur. A unga ning a longori, i arlar ana tarai ning la sian anunla na gita.

³ La saken a tona saksak salanigo na keskes a king, pa diat a lalaun a akakes pa ningnigola. Bel tik ir tolsot pas suir asaer ana saksak ne. Takai a mar diat a bonot pa pisir diat a rip ning e God ka lou alangolango pas la mite na rakrakan hanua, la ka, lar tolsoti.

⁴ La ne, bel la dur, anasa bel la borbor taum ana gurarala. La mur a Nat a Sipsip ting na pukpukna ning i sira han ia. Arpotor tana taraila te na rakrakan hanua di lou langolango pas la. Di saran la tetek e God pa tetek a Nat a Sipsip, arlar ana ningnigo na wana ning di sira artabar onoi tetek e God.

⁵ Bel di longor tar ta asasongo miting na pahanla, pa bel di tiu sot pas la on ta rongo.

Natol a angelo ditol warwara talapor ana warkurai

⁶ Lamur a oroi ning a angelo maleng i rowoi saot na solsolna, pa i kibas a Wakak a Warwara ning ir kes tikin, suir warawai onoi tetek a taraila ning la kes te na rakrakan hanua, a tarai miting na matanitula rop, pa miting na mangis a

14:2: 14:2 Tatatai 1:15; 19:6

14:3: 14:3 Aisaia 42:10; Tatatai

5:9; 7:4

tarai rop, pa miting na urmatana ngas a warwarala rop pa miting na hananuala rop.

⁷ Pa i warwara ana tnan elngena mang, “Mulor matmataut sur e God, pa mulor atong aйна pasu, anasa anuna pukakiar a warkurai ka hanot. Mulor lotu tetek e God, esaning i akes a bakut, a rakrakan hanua, a tasi pa matana malumla.”

⁸ A munaur a angelo i mur pa i atongi mang, “A tnan hanua Babilon ka punga! Ka punga! Esaning i agang a tarai miting na matanitu rop ana rakrakai a wain ana nuna pamuk a toltolla.”

⁹ A munatol a angelo i mur diau pa i warwara ana tnan elngena mang, “Ning tik ir lotu tetek a rokoio na inagoi pa manarna, pa ir kibas anuna akinalang ting na patarna o a kuna,

¹⁰ i otleng ir gang ting na wain a balakut ane God. A wain ne di ka sang tari, a rakrakaina i itna kol, pa di peki uting na kap a balakut ane God. Dir akadiki ana iah pa salfa salanigo tana Nat a Sipsip pa na totoh a angelo ane God.

¹¹ Pa sasawan ana nunla na kankan ir sasawan kas, bel ir rarop. La ning la lotu tetek a rokoio na inagoi pa manarna, pa la ning a akinalang ana risana kaning onla, bel lar manah ana kabakiarla pa moromla.”

¹² Larne, ir wakak sur a tarai ane God, lar tur rakrakai, la ning la sira longor ana warkurai ane God pa anunla a tortorot i tur rakrakai oe Iesu.

14:8: 14:8 Aisaia 21:9; Jeremaia 51:7, 8; Tatatai 17:2; 18:2, 3
14:9: 14:9 Tatatai 13:12-17 **14:10:** 14:10 Stat 19:24; Buk Song 75:8; Aisaia 51:17, 22; Jeremaia 25:15-16; Esekiel 38:22; Tatatai 16:19; 20:10; 21:8 **14:11:** 14:11 Aisaia 34:10 **14:12:** 14:12 Tatatai 13:10

¹³ Lamur a longor a elngen takai misaot na langit i atongi mang, “Ur tumus a utna ne: La ning la ka mat ana tortorot ana Leklek, turpasi anone pa lamur, la angis.” A Talngan Tabu i atongi mang, “Momolna, lar manah kusun anunla na titol, anasa anunla a titolla ir han taum onla.”

Dir sol a rakrakan hanua anasa ka makos

¹⁴ Ning a tai, a oroi pas a kokok a bakut, pa takai i “arlar ana Nat a Barsan” i kes saot onoi. I suah pas a kukuh a king ning di toli ana gol ting na pukulna, pa ting na kuna i tong pas a liwan ning i harat kol.

¹⁵ Ning a angelo maleng i han purum misaot na rumai artabar, pa i arkabah ana tnan elngena tetek esaning i kes saot na bakut larne, “Kibas pas anum a liwan pa ur sol. A pukakiar na sol ka hanot, anasa a ututnala te na rakrakan hanua ka makos rop.”

¹⁶ Pa esaning i kes saot na bakut, i pirat ana nuna liwan te na rakrakan hanua, pa i sol te na rakrakan hanua.

¹⁷ Ning a angelo maleng i purum misaot na rumai artabar saot na langit. I otleng i tong a liwan ning i harat kol.

¹⁸ Pa ning a angelo maleng, esaning i warkurai sur a iah, i purum miting na logo na tun artabar, pa i arkabah ana tnan elngena tetek esaning i tong pas a liwan ning i harat kol mang, “Ur kot a kurena wainla mite na rakrakan hanua, pa ur suah taman la, anasa la ka makos rop.”

¹⁹ Pa angelo i pirat ana nuna liwan, pa i suah taum a wana wain mite na rakrakan hanua. Pa i migen tari uting na tnan tung a hat, ning di sira pas miren a wana wain tingia sur a polona ir hanot. A tnan tung ning i tur aslang a balakut ane God.

²⁰ Pa di miren a wana wain ting na tung ning, tumo lapiu ana taman ana tnan hanua. Pa suluk i saler ot miting na tung ning. I barah arlar ana takai a rip pa diono na mar a stadia*, pa i lomom kas usaot tuk ting na puka aen ning kaning na pahana hos.

15

Mais a angelo pa mais a besen na akadik

¹ Pa a oroi ning a tnan akinalang ulak saot na langit, pa a kulkulan kol onoi. Mais a angelo la tong pas mais a akadik. Na akadik ne, na araropna, anasa a balakut ane God i bot sot.

² Pa a oroi ning a utna i tai arlar ana tasi di toli ana galas ning di ka suah tamani ana iah. La ning la tolsot pas a rokoio na inagoi pa manarna pa wawas ana risana, la tur ting na ris a tasi ning, pa la tong a gitala ning e God ka saran tari tanla.

³ La saken a saksak ane Moses, a tena titol oros ane God, pa saksak ana Nat a Sipsip mang, “Leklek e God u rakrakai kol, anum na titol la itna pa di kulkulan kol onla. U a King ana mangis a tarai rop,

14:20: 14:20 Aisaia 63:3; Tatatai 19:15 * **14:20: 14:20** I arlar ana natol a mar a kilomita. **15:3: 15:3** Kisim Bek 15:1; Buk Song 139:14; 145:17

anum na toltol la tostos pa la momol.

⁴ Leklek, a taraila rop lar hanrawai u.

Pa la rop lar atong aleklek pas a risam.

Anasa u ka u totoh.

A taraila miting na matanitula rop lar hanot

pa lar lotu tetek u,

anasa anum na tostos a titol i talapor rop tetek
la.”

⁵ Lamur tana, a tai pa a oroi pas a rumai artabar saot na langit i sapang. A rumai ning a rumai a sel ning i apuasa i mang e God i kes taum ana nuna tarai.

⁶ Pa mais a angelo ning la tong pas mais a akadik, la purum misaot na rumai artabar ning. La mermer ana wakak a kaenla ning la totoh pa la talapor kol, pa la dot na malwasinla ana inau a gol.

⁷ Pa ning a halin diat a lalaun a akakes i saran tar mais a besen di toli ana gol tetek mais a angelo ning. Pa mais a besen ana gol ne la bukus ana balakut ane God, esaning i laun tikin bel ir rarop.

⁸ Pa rumai artabar i bukus ana sasawan miting na matatar ane God pa miting na rakrakaina. Pa bel tik ir tolsot pasi suir kas uting na rumai, tuk ning dir tolsot pas mais a akadik ana mais a angelo ning.

16

Mais a angelo la pek mais a besen a balakut ane God

15:4: 15:4 Jeremaia 10:6-7; Buk Song 86:9 **15:5:** 15:5 Kisim Bek 38:21 **15:8:** 15:8 1 King 8:10-11; 2 Stori 5:13-14; Aisaia 6:4

¹ Lamur a longor a tnan elngen takai misaot na rumai artabar i atongi tetek mais a angelo ning larne, “Mulor han pa mulor pek mais a besen a balakut ane God utumo na rakrakan hanua.”

² A ningnigo na angelo i han pa i pek anuna besen a balakut saot na kabalapiu. Pa laulau a masikla, ning la sursuren kol, la hanot ting na palaona tarai ning a akinalang anuna rokoio na inagoi kaning onla pa la sira lotu tetek a manarna.

³ A munaur a angelo i pek anuna besen a balakut saot na tasi, pa tasi i keles sur a suluk arlar ana suluk a barsan ning i mat. Pa ututnala rop ning la laun ting latasi la mat.

⁴ A munatol a angelo i pek anuna besen a balakut saot na malumla, pa ting na matmatana malumla, pa la keles sur a suluk.

⁵ Pa a longor a angelo ning i tai alar a tasi pa malumla, i atongi mang,

“E God, u laun nigo pa u laun anone, a Tena Totoh u,

u tostos pa anum na warkurai a arkeles i tostos.

⁶ U ka agang tar la ana suluk sur ir arlar ana warkurai a arkeles tetek la, anasa ana nunla na laulau a titol, anasa la ka umkol tar anum a tarai pa anum a propetla, pa sulukinla ka tapek.”

⁷ Pa a longor a elngen takai misaot na logo na tun artabar i atongi mang,

“A momolna, a Leklek e God u rakrakai kol,

anum na warkurai i momol pa i tostos.”

⁸ Pa mundiat a angelo i pek anuna besen a balakut saot na Kamis, pa e God i saran tar a rakrakai ana Kamis suir tun a tarai ana iah.

⁹ Pa tnan laplapang a iah ning, i tun a tarai, pa la atong saksakan a risana e God, esaning na akadik ne kaning nahai a warkurai a arkeles anunai, ika bel la lingir a nuknukinla, pa bel la atong leklek pasi.

¹⁰ A mundilima na angelo maleng i pek anuna besen a balakut saot na keskes a king anuna rokoio na inagoi, pa puknala ning i sira warkurai suri i mormorom rop. Pa tarai la harat a laigereminla ana tnan kankan ning,

¹¹ pa la atong saksakan e God ning i kes saot na langit, anasa ana tnan kankan pa laulau a masikla ning kaning na palaonla, ika bel la lingir a nuknukinla kusun anunla na toltol laulaula.

¹² A mundiono na angelo i pek anuna besen a balakut saot na tnan malum Iupretis, pa i masa rop suir sang a ngas anuna kingla mitumo na matmatana tobar.

¹³ Lamur a oroi pas natol a mot ditol tatatai arlar lar natol a rokrok. Takai i purum miting na pahana dregon, takai miting na pahana rokoio na inagoi pa takai miting na pahana asasongo na propet.

¹⁴ Ditol natol a mot, pa ditol tol a akinalangla, pa ditol han sarara sur na king mite na rakrakan hanua rop, sur ditol ir ben taum la sur a harum

ana tnan pukakiar ane God, esaning i rakrakai kol.

¹⁵ “Oroi, ar hanot arlar ana tena kinkinau. Esining i kes na tai alar pa i sang anuna kaenla, i angis, sur bel ir mengere pa bel ir meme.”

¹⁶ Pa natol a mot ditol ben taum tar a kingla uting na pukna ning di atongi ana warwara Hibru mang Amagedon.

¹⁷ Pa ararop a angelo miting na mais a angelo, i pek anuna besen a balakut saot na solsol, pa tnan elngen takai i purum miting na keskes a king saot na rumai artabar, pa i atongi mang, “Ka rop!”

¹⁸ Lamur a pil, a unga, a pungpugur pa tnan mamais kol i hanot. Turpasi miting na akakes ana tarai, belot ta mamais larne i hanot tar te na rakrakan hanua. A tnan mamais ning i laulau kol.

¹⁹ A tnan hanua Babilon i tapagal sur natol, pa na tatatnan hanua anuna tarai miting na matanitula, la tarege rop. E God i nuk pas a tnan hanua Babilon pa i agangi ana wain i bukus ana ngalngaliah a balakut anunai.

²⁰ Na lolo rop la ka rorom pa na mangir otleng bel ma di oroi la.

²¹ A tnan kiar a ais, taktakai a tutuna i arlar ana dilima na bonot a kilogrem i punga saot na tarai. Pa tarai la atong saksakan e God ana akadik a kiar a ais ne, anasa a akadik ne i laulau kol.

16:15: **16:15** Matiu 24:43-44; Tatatai 3:3 **16:16:** **16:16** Sekaraia 12:11 **16:18:** **16:18** Tatatai 4:5; 8:5 **16:19:** **16:19** Tatatai 14:10
16:20: **16:20** Tatatai 6:14 **16:21:** **16:21** Kisim Bek 9:23-24; Tatatai 11:19

17

A pamuk a hane ning i tur aslang a tnan hanua Babilon

¹ Takai miting na mais a angelo ning la tong mais a besen, i han tetek iau pa i atai iau mang, “Han ute, ar asangan tar u ana warkurai a arkeles tetek a pamuk a hane ning a risana i han sarara ana nuna toltol laulau. Kaning i kes saot na malumla.

² A kingla mite na rakrakan hanua la tol a laulauna taum onoi. Pa tarai mite na rakrakan hanua la sipak ona wain ana pamuk a toltol anunai.”

³ A bukus ana Talngan Tabu pa angelo ning, i kibas pas iau usaot na hanua bel. Tingia a oroi pas takai a hane i kes tar saot na kubar a rokoio na inagoi. A rokoio na inagoi ning, mais a pukulna pa ning a bonot a komna pa palaona i bukus ana risingla ning di atong saksakan e God onoi.

⁴ A hane ning, i mermer ana kaen i pepol pa i kubar otleng, pa di amermeri ana gol pa wakak a hatatla ning a matanla i abit, pa na wakak a kabaruruan. Ting na kuna i tong a kap ning di toli ana gol. I bukus ana laulau a ututnala pa na dur a toltol miting na nuna pamuk a toltol.

⁵ Di tumus tar a risana ting na patarna, a utna na pidik larne,

A TNAN HANUA BABILON,
A KABATNAN A PAMUK A HANELA
PA NA LAULAU A TOLTOL KOL

17:1: 17:1 Jeremaia 51:12-13 **17:2: 17:2** Aisaia 23:17; Jeremaia 51:7; Tatatai 14:8 **17:3: 17:3** Tatatai 13:1 **17:4: 17:4** Jeremaia 51:7; Tatatai 18:16

ANUNA RAKRAKAN HANUA.

⁶ A oroi a hane ning i sipak, anasa i gang a suluk a tarai ane God, a sulukinla ning la warwara talapor oe Iesu.

Ning a oroi i, a kulkulan kol.

⁷ Pa angelo i atai iau mang, “Asa kamkamna ning u kulkulan? Ar pak a kamkama hane, pa rokoio na inagoi ning i kes tar saot onoi, ning mais a pukulna pa ning a bonot a komna.

⁸ A rokoio na inagoi ning u oroi tari, i laun pas nating, pa bel i laun anone, pa lamur ir hanot ulak miting na tnan tung ning bel ta araropna, pa ir han suir hirua. Pa tarai te na rakrakan hanua ning bel di tumus a risanla ting na buk a lalaun, ning e God belot i akes a rakrakan hanua, lar kulkulan ning lar oroi a rokoio na inagoi ne. Anasa i laun pas nating, pa bel i laun anone, pa lamur ir hanot ulak.

⁹ “Esining i tastamai ir talapor wakak ana utna ne. Mais a pukulna a kamkamna mang mais a mangir ning a hane ning i kes tar saot onla.

¹⁰ Ning a kamkamna otleng mang mais a king. Dilima ka mat, takai kama kane i kes, pa ning a halinla otleng belot i hanot. Ning ir hanot ir kes siklik pas ka.

¹¹ Pa rokoio na inagoi ning ka laun pas nating, pa bel i laun anone, esaning a siwal a king. I miting na mais a king ning, pa ir han suir hirua.

¹² “Takai a bonot a komna ning u oroi i, la ning, takai a bonot a king, ning belot la kibas ta

warkurai sur lar hanot a kingla. Ika ana diono na bonot a minit ka lar warkurai taum ana rokoio na inagoi arlar ana king.

¹³ A nuknukinla i takai ka, pa lar saran tar a rakrakainla pa anunla a warkurai tetek a rokoio na inagoi.

¹⁴ Lar harum taum ana Nat a Sipsip, ika a Nat a Sipsip ir tolsot pas la, anasa ai a Leklek anuna leklekla, pa King anuna kingla. A tarai ning la tur taum onoi, la ning ka aslang pas la pa ka kabah pas la pa la tortorot momol onoi.”

¹⁵ Pa angelo i atai iau mang, “Na malum ning u oroi, ning a pamuk a hane i kes tingia, la tur aslang na tarai miting na hananuala, a galis a tarai, a tarai miting na matanitula pa miting na urmatana ngas a warwarala.

¹⁶ Pa rokoio na inagoi pa ning a bonot a kom ning u oroi la, lar nget a pamuk a hane. Lar alaulau i pa lar kepsen anuna mermer pa ir mengere kama. Lar ien a sisna, pa lar tun seni ting na iah.

¹⁷ Anasa e God ot ka anuknuk tar la sur lar tolsot pas a nuknukna lerne: Lar saran tar a rakrakainla ning la warkurai onoi tetek a rokoio na inagoi, tuk ning dir tolsot pas a warwarala ane God.

¹⁸ A hane ning u oroi, a tnan hanua kol, ning i warkurai sur a kingla te na rakrakan hanua.”

18

E Babilon ka punga

¹ Lamur tana utna ne, a oroi ning a angelo maleng i han purum misaot na langit. I tong akes a rakrakai a warkurai pa nuna matatar i atalapor a rakrakan hanua.

² Pa i woiwoi ana tnan elngena mang,
 “A tnan hanua Babilon ka pungu! Ka pungu!
 I hanot a pukna ana motla,
 pa rumai a mumun anuna laulau a ingunla,
 pa rumai a mumun anuna manila ning la
 dur
 pa rumai a mumun anuna inagoila ning la
 dur pa la bilbilor.

³ Ka pungu, anasa na tarai miting na matanitu rop la ka gang pas a rakrakai a wain ana nuna pamuk a toltolla.

A kingla mite na rakrakan hanua la tol a pamuk a toltol taum onoi.

Pa tena siusiuraila mite na rakrakan hanua la leklek ana galis a gongon miting na nuna keskes na leklek.”

⁴ A longor maleng a elngen takai misaot na langit i atongi larne,

“Anuk a tarai, mulor purum kusuni,
 sakana mulor kes taum onoi ana nuna toltol
 laulaula,
 sur gong mulo otleng mulo kilang a akadikla
 ning i kibasi.

⁵ Anasa anuna toltol laulau i galis kol pa i tuk pas ot a langit,
 pa e God ka nuk akes anuna laulau a titolla.

18:2: 18:2 Tatatai 14:8; Aisaia 13:21; 34:11-14; Jeremaia 50:39

18:4: 18:4 Aisaia 48:20; Jeremaia 50:8; 51:6, 45; 2 Korin 6:17

18:5: 18:5 Stat 18:20-21; Jeremaia 51:9

- 6 A toltol ning i toli tetek mulo, mulor tol ulaki teteki,
 a toltol ning i tol tari tetek mulo, mulor munaur na kelesi teteki.
 A kap ning i agang tar mulo onoi,
 mulor munaur na abukusi sur ir gangi.
- 7 Mulor saran a tnan kankan pa tnan balmaris tana,
 ir galis arlar ana tnan matatar pa keskes na leklek ning i tong akesi.
- I nuki ono i ot mang,
 'Tau a kwini, pa kes ana nuk a keskes a kwini.
 Bel iau a lao,
 bel a tolsot sur ar balmaris.'
- 8 I maining a akadikla ne, a minat, a balmaris pa munurak
 lar hanot teteki ana ning a pukakiar sot ka.
 Pa dir tun seni ting na iah
 anasa a Leklek e God i rakrakai kol,
 esaning i saran tar a warkurai a arkeles teteki.
- 9 "A kingla mite na rakrakan hanua, ning la tol a laulauna taum ana pamuk a hane ning, pa la ka kibas na gongon miting na nuna keskes na leklek taum onoi, ning lar oroi a sasawana iah ning di tun a hane ning ono, lar balmaris pa lar tangis.
- 10 Lar tur bakbak tar kama kusuni, anasa la matatan a kankan ning dir akadiki onoi. Pa lar atongi mang,
 'A tnan hanua Babilon ka laulau. Ka laulau!

E Babilon, a rakrakai a hanua!
 Ana diono na bonot a minit sot ka, anum a
 warkurai a arkeles ka hanot tetek u.’

¹¹ “Na tena siusiurai mite na rakrakan hanua
 lar tangis pa lar balmaris onoi, anasa bel ma tik
 ir lou anunla ututnala na siusiurai.

¹² A ututnala na siusiurai lerne: a gol, a silwa,
 na wakak a hatat ning a matanla i abit, pa na
 kabaruruan, pa na wakak a kaen, na kaen ning
 la pepol, na kaen ning la silika pa na kubar a
 kaen, pa na rakai ning la toboh wakak, pa
 urmatana ngas a utna ning di toli ana kom a
 elepan, pa ana wakak a rakaila ning a matanla i
 abit, pa bras, a aen pa wakak a hatat ning di
 atongi ana mabel.

¹³ Pa dingla na ututnala ning la toboh wakak,
 pa naur a utna ning dia toboh wakak di atong
 diau a sinamon pa mira, pa paura di tuni pa
 sasawana i toboh wakak ning di atongi a insens,
 pa wain, a wel na oliw, a palawa pa witla, pa
 bulumakaula pa na sipsip, na hos pa na karis
 ono, pa tarai ning la na tena titol oros.

¹⁴ “Na tena siusiurai lar atongi mang, ‘A
 ututnala ning u mang kol suri ka rorom. Anum a
 gongonla pa num na matatar, la otleng la ka
 rorom kusun u, pa bel ulak ma ur oroi tar la.’

¹⁵ Na tena siusiurai ning la sira siuran a
 ututnala ne, ning e Babilon i angis la ana galis a
 gongon, lar tur bakbak tar kama kusuni, anasa
 lar matatan a kankan ning di akadiki onoi. Lar
 balmaris, lar tangis,

16 pa lar arkabah mang,
 ‘A tnan hanua Babilon ka laulau! Ka laulau!
 I mermer ana wakak a kaenla, ning i pepol
 pa i kubar,
 pa di amermeri ana gol, pa na wakak a hatat
 ning a matana i abit pa na wakak a
 kabaruruan.

17 Ana diono na bonot a minit ka, di alaulau rop
 sen anum a galis a gongon!’

“Pa na kipten rop pa la ning la han taltal ana
 sip, na tena titol miting na sipla, pa la ning la
 kibas a mani miting na titol ana sipla, lar tur
 bakbak kusuni.

18 Ning lar oroi a sasawana iah ning di tun e
 Babilon ono, lar arkabah mang, ‘Bel ta hanua i
 arlar ana wakak a hanua ne i itna kol.’

19 Lar sapran a kubus saot na pukulunla pa lar
 balmaris, lar tangis pa lar arkabah mang,
 ‘A tnan hanua Babilon ka laulau! Ka laulau!
 La ning la kibas a mani miting na sipla,
 la na tena gongon ana nuna galis a
 gongonla!

Diono na bonot a minit ka, pa ka laulau rop!

20 Mulo saot na langit, mulor gas ono!

Pa tarai ane God pa na aposel pa na propet,
 mulor gas!

E God i saran a warkurai a arkeleş teteki ana
 ututnala ning i toli omulo.’”

21 Pa ning a rakrakai a angelo i kibas pas a
 tnan hat, i itna arlar ana hat ning di sira gini a

18:16: 18:16 Tatatai 17:4 **18:17: 18:17** Aisaia 23:14; Esekiel
 27:27-29 **18:18: 18:18** Esekiel 27:32 **18:20: 18:20** Aisaia
 44:23; Lo 32:43; Jeremaia 51:48 **18:21: 18:21** Jeremaia 51:63-64;
 Esekiel 26:21

witla ono, pa i migen parung seni salatasi pa i atongi mang,

“Dir migen tosngen sen a tnan hanua Babilon arlar ana hat ne, pa bel ulak ma dir oroi i.

²² A elngen na tena tol saksak pa na tena wus kaur pa na tena wus tawuru pa na tinangis ana gitala, bel ulak ma dir longor tari ting napirim.

Bel ulak ma ta tena titol ana kuna ir kes taum hom.

Pa bel ulak ma dir longor tar a tinangis ana hat ning di sira gini a witla ono.

²³ Bel ulak ma ta talapor ana lam ir sasai ting napirim.

Bel ulak ma dir longor tar a elngen ta tona tinaulai, a barman pa basbas ting napirim.

Lanigo anum na tena siusiurai la na leklek te na rakrakan hanua.

U ben rongon pas na tarai miting na matanitu rop ana num a kapil.

²⁴ A suluk a propetla pa na tarai ane God, pa la rop otleng ning di umkol la te na rakrakan hanua, di pastetek a sulukinla tumo e Babilon.”

19

Di atong aitna pas e God saot na langit

18:22: **18:22** Aisaia 24:8; Ezekiel 26:13 **18:23:** **18:23** Jeremaia 7:34; 16:9; 25:10 **18:24:** **18:24** Jeremaia 51:49; Tatatai 17:6

¹ Ning ka rop a ututnala ne, a longor a tnan
agaia lar a elngen a tnan kunum a taraila saot
na langit, la kukuk mang,
“Haleluia!

E God anundalai, ka alaun pas dala, a matatar
pa rakrakai anunai ka,

² anasa anuna warkuraila i momol pa i tostos.
Ka saran tar a warkurai a arkeles tetek a pamuk
a hane, ning a risana i han sarara ana
nuna toltol laulau,
esaning i alaulau a rakrakan hanua ana nuna
pamuk a toltolla.

E God ka saran tar a warkurai a arkeles teteki,
anasa ana suluk anuna tena titol orosla,
ning i umkol la.”

³ Pa la kukuk ulak mang,
“Haleluia!

Pa sasawan a hane ning i han kas usaot bel ir
rarop.”

⁴ Naur a bonot pa pisir diat a ningnigo pa diat
a lalaun a akakes la punga hanrawai, pa la lotu
tetek e God, esaning i kes ana nuna keskes a king
pa la atongi mang,
“Amen, Haleluia!”

⁵ Pa elngen takai i hanot miting na keskes a
king, i atongi mang,
“Mulor atong aitna pas anundala a God,
mulo anuna tena titol orosla,
mulo ning bel al risamulo pa mulo ning
mulo leklek,
mulo ning mulo hanrawai i!”

⁶ Pa a longor a agaia lar a elngen a tnan
kunun a tarai, lar otleng a unga na malum ning
i naro, pa rakrakai a pungpugur, i kukuk mang,
“Haleluia!

Anasa anundala a Leklek e God,
ning i rakrakai kol,
i kes na king.

⁷ Dalar gas,
pa dalar rakan aleklek pasi!

Anasa a pukakiar a tinaulai anuna Nat a Sipsip
ka hanot,
pa nuna hane ka sang.

⁸ Di ka saran tar na wakak a kaen, ning i talapor
pa i totoh tetek a hane,
suir mermer ono.”

Na wakak a kaen ning, i tur aslang na tostos a
toltol ana tarai ane God.

⁹ Pa angelo i atai iau mang, “Ur tumusi larné:
La ning di atai tar la sur a ngasa na tinaulai ana
Nat a Sipsip, la angis!” Pa i atongi otleng mang,
“Na warwara ne na momol a warwara ot ane
God.”

¹⁰ Lamur a punga hanrawai milau naur a
hana suar lotu teteki. Ika i atai iau mang, “Gong!
Iau otleng a tena titol oros ka lar u pa na
tastasim ning la tong akes a warwara talapor oe
Iesu. Ur lotu tetek e God! Anasa a warwara
talapor oe Iesu, i ot i anuknuk a tarai sur lar
warwara na propet.”

Esaning i kes saot na kokok a hos

19:6: 19:6 Tatatai 14:2

19:7: 19:7 Aisaia 61:10; Tatatai 21:2

19:9: 19:9 Matiu 22:2-3

19:10: 19:10 Aposel 10:25, 26; Tatatai

22:8-9

¹¹ A oroi a langit ka sapang pa a oroi a kokok a hos i tur salanigo tak. Pa esaning i kes saot ono di atongi mang “I sira tolsot anuna titol” pa “I momol.” Anuna warkurai pa nuna harum i tostos.

¹² Naur a matana i arlar ana irnga na iah, pa galis a kukuh a king kanisaot na pukulna. Pa di ka tumus tar a rising ting na palaona, ning bel tik i tasmani, i sot ka i tasmani.

¹³ I mermer ana kaen ning di amurungi ting na suluk. Pa risana, “A Warwara ane God.”

¹⁴ A kunum a tarai a harum misaot na langit la kas ana kokok a hosla pa la muri. La mermer ana wakak a kokok a kaenla i totoh.

¹⁵ Pa liwan a harum ning i harat kol kaning na pahana i gom pasi, suir ting amat na tarai miting na matanitula ono, pa ir warkurai rakrakai la ana bulse na aen. I pas gingini a wana wain ting na tung a hat ning i tur aslang a ngalngaliah a balakut ane God, esaning i rakrakai kol.

¹⁶ Ting na nuna kaen pa ting na kinwar a hana, di ka tumus tar a risana larne,

A KING ANUNA KINGLA
PA LEKLEK ANUNA LEKLEKLA.

¹⁷ Pa a oroi ning a angelo i tur tar ting na kamis, pa i arkabah ana tnan elngena tetek a manila rop ning la rowoi saot na solsolna mang, “Mulo rowoi ute, mulor han taum ana tnan ngasa ane God,

19:11: 19:11 Tatatai 1:5; 6:2; Buk Song 96:13; Aisaia 11:4 **19:12: 19:12** Daniel 10:6; Tatatai 1:14; 2:17 **19:13: 19:13** Aisaia 63:1-3; Jon 1:1, 14 **19:15: 19:15** Buk Song 2:9; Tatatai 1:16; 14:20
19:16: 19:16 Tatatai 17:14 **19:17: 19:17** Esekiel 39:17-20

¹⁸ sur mulor ien a sis a palaona kingla, na ningnigo anuna tarai a harum, a tarai a harum, a hosla pa la otleng ning la kas onla, pa sis a palaona tarai rop, na tena titol oros, pa la ning bel na tena titol oros, la ning bel al risanla pa la ning la leklek.”

¹⁹ Lamur a oroi a rokoio na inagoi pa kingla mite na rakrakan hanua, pa anunla na kunum a tarai a harum ning la han taum sur lar harum taum o esaning i kas ana hos pa nuna kunum a tarai a harum.

²⁰ Ika di tong akes pas a rokoio na inagoi pa asasongo na propet, esaning ka tol a akinalangla ana risana rokoio na inagoi. Ning i tol a akinalangla ning, i asongo pas la ning a akinalang ana rokoio na inagoi kaning onla, pa la lotu tetek a manar a rokoio na inagoi. Di migen lalaun tar a asasongo na propet pa rokoio na inagoi ting na tnan tung a iah ning i irnga ana salfa.

²¹ Di umkol anundiau a kunum a tarai a harum ana liwan a harum kaning na pahana esaning i kas ana hos. Pa manila rop la ien a sis a palaonla pa la masur onoi.

20

Takai a rip a rau

¹ A oroi pas ning a angelo i han purum misaot na langit, i tong pas a ki ana tnan tung ning bel ta araropna, pa i tong pas otleng a tnan sen.

² I tong akes pas a dregon, a soi tagun nating, ning di atongi mang a tena artitiu, e Satan. I sen akes tari tuk ot ning takai a rip a rau ir rop.

³ I migen purum tari ting na tnan tung ning, pa i tagar alari, sur gong ulak ma i asongo tar a tarai miting na matanitula rop, tuk ning takai a rip a rau ning ir rop. Lamur tana, dir pak seni suir langolango pas ka siklik taim, bel ir bongnani.

⁴ Pa a oroi na keskes a king, pa la ning la kes saot onla, ning di ka saran tar a rakrakai tanla sur lar warkurai. Pa a oroi a ingun a tarai ning di ka kot kutus tar a pukulunla, anasa ana nunla na warwara talapor oe Iesu pa ana warwara ane God. Bel la lotu tetek a rokoio na inagoi pa manarna, pa bel di kibas a akinalang anuna rokoio na inagoi ting na patarinla o ting na kunla. La laun ulak pa la warkurai taum oe Karisito ning a rip a rau.

⁵ Ine a ningnigo na kamkamtur ulak kusun a minat. Ika la rop ning la ka mat pa bel la laun ulak ana taim ning, lar borbor tuk ning a rip a rau ning ir rarop, pa lar kamtur bot kusun a minat.

⁶ La ning di alaun la ana ningnigo na kamkamtur ulak kusun a minat, la angis pa la na totoh a tarai ane God. A munaur a minat bel ta rakrakai sur ir alaulau la. La na tena artabar tetek e God pa e Karisito. Lar warkurai taum oe Karisito ning a rip a rau.

Di tolsot pas e Satan

⁷ Ning a rip a rau ning ka rop, dir pak sen e Satan miting na nuna keskes a karabus.

⁸ Pa ir han suir asongo pas a tarai miting na matanitula ting na diat a matana wuwu, na tarai ning di atong la e Gok pa e Magok. Ir ben taum la sur a harum. A wawasinla ir arlar ana woio miting na hang.

⁹ Pa lar han miting na hananuala rop te na rakrakan hanua, pa lar tur talilis pas a tarai ane God, pa tnan hanua ning e God i maris koli. Ika a iah ir han purum misaot na langit pa ir tun arop sen a tarai a harum ning.

¹⁰ Pa dir migen purum sen e Satan, esaning i asongo pas la. Ir kes ting na tnan tung a iah pa salfa, ning di ka migen purum tar kaba a rokoio na inagoi pa asasongo na propet ia. Tingia dir akadik ditol ana kabakiarla pa moromla, bel ir rarop.

A ararop a warkurai

¹¹ Lamur a oroi pas a tnan keskes a king i kokok, pa esaning i kes onoi. A rakrakan hanua pa bakut dia rorom miting na matana, bel ta pukna ulak ma anundiau.

¹² Pa a oroi a minatla rop, la ning la leklek pa la ning bel al risanla, ning la tur tar salanigo na keskes a king, pa di sapang a bukla. Di sapang ulak ning a buk, a buk a lalaun. Pa di warkurai a

20:8: 20:8 Esekiel 38:2, 9, 15-16 **20:9:** 20:9 2 King 1:10 **20:10:** 20:10 Buk Song 11:6; Tatatai 19:20; 21:8 **20:12:** 20:12 Daniel 7:9-10; Matiu 25:31-46; Aposel 17:31; 2 Korin 5:10; Tatatai 13:8

minatla arlar ana nunla a titolla ning di ka tumus akes tari ting na bukla.

¹³ A tasi i saran ulak a minatla ning la mat salatasi. A minat pa Hedes, a hanua anunla ning la mat, diau otleng dia saran ulak a minatla ning kaning ondiau. Di warkurai la taktakai arlar ot ana nunla na titol.

¹⁴ Lamur di migen purum sen a minat pa Hedes uting na tnan tung a iah. A tung a iah ning, a munaur a minat.

¹⁵ Pa la ning bel di pastek a risanla ting na buk a lalaun, di migen purum sen la uting na tnan tung a iah.

21

A tona langit pa tona rakrakan hanua

¹ Lamur a oroi a tona langit pa tona rakrakan hanua, anasa a ningnigo na langit pa ningnigo na rakrakan hanua dia ka rorom, pa bel ma ta tasi.

² Pa a oroi a tona Jerusalem, a hanua ane God, i han purum misaot na langit ta e God. Di ka sang tari larning di ka amermer wakak tar a hane sur anuna barsan sur diar taulai.

³ Pa a longor a tnan elngen takai misaot na keskes a king i atongi mang, “Oroi, a hanua ane God ka kes taum ona tarai. I ot ir kes taum onla, pa lar hanot anuna tarai. E God ir kes taum onla, pa ir hanot anunla God.

20:13: 20:13 Rom 2:6; 1 Pita 1:17; Tatatai 2:23; 22:12 **21:1: 21:1**
 Aisaia 65:17; 2 Pita 3:13 **21:2: 21:2** Aisaia 52:1; 61:10; Hibru
 11:16; 12:22; Tatatai 3:12 **21:3: 21:3** Wok Pris 26:11, 12; Esekiel
 37:27; Sekaraia 2:10; 2 Korin 6:16

⁴ Pa ir sah sen a lurus matanla rop. Bel ma ta minat ulak, bel ta balmaris, bel ta tinangis pa bel ma ta kankan, anasa a ututnala tagun nating la ka rorom.”

⁵ Pa esaning i kes ting na keskes a king i atongi mang, “Oroi, onone a atona ututnala rop!” Pa i atongi otleng mang, “Ur tumus akes a warwarala ne, anasa a warwarala ne la momol pa i tolsot pasi sur dir tortorot ono.”

⁶ Pa i atai iau mang, “Ka rop! Iau a Alpa pa Omega, a kamkamna pa araropna. Esaning i mos ar agangi ana malum miting na matmatana malum, a malum a lalaun, ning bel di sira lowi.

⁷ Esining ir tolsot pas a harum, ir kibas pas a ututnala rop ne, pa iau ar God anunai, pa ir hanot a natuklik.

⁸ “Na tena matmataut, pa la ning bel la tortorot, pa la ning anunla na toltol i dur, pa na tena umkol a tarai, pa la ning la tol na pamuk a toltol, na tena wah, la ning la lotu tetek a asasongo na godla, pa tena asasongola rop, anunla pukna kaning na tnan tung ning i irnga ana iah pa salfa. Ine a munaur a minat.”

A tona Jerusalem

⁹ Ning a hal a mais a angelo, ning la tong mais a besen ning i bukus ana mais a ararop a akadik, i hanot pa i atai iau mang, “Han ute, ar asangan

21:4: **21:4** Aisaia 35:10; 65:19; Tatatai 7:17 **21:5:** **21:5** 2 Korin 5:17 **21:6:** **21:6** Aisaia 55:1; Jeremaia 2:13; Jon 7:37; Tatatai 1:8, 17; 22:17 **21:7:** **21:7** 2 Samuel 7:14; Buk Song 89:26-27 **21:8:** **21:8** Matiu 25:41; Hibrui 10:38-39; Tatatai 20:15; 22:15

tar u ana tona tinaulai, a hane anuna Nat a Sipsip.”

¹⁰ A bukus ana Talngan Tabu, pa angelo ning i kibas pas iau usaot na tnan mangir ning i tur kas usaot. Pa i asangan tar iau oe Jerusalem, a hanua ane God, i han purum misaot na langit ta e God.

¹¹ I sasai ana matatar ane God, a talaporna i pilpil arlar lar a wakak a hat ning a matana i abit, di atongi ana jaspera, pa i talapor arlar ana galas.

¹² Pa tnan woroh ning i tur talilisi, i tur kas usaot, pa ning a bonot pa pisir naur a taman, pa ning a bonot pa pisir naur a angelo la tur ting na tamanla. Ting na tamanla ning, di ka tumus tar a risan ning a bonot pa pisir naur a mangis a tarai Israel.

¹³ Natol a taman ditol tai sur a pukna ning a kamis i pusa ia, natol ting na matana labur, natol ting na matana tobar, pa natol ditol tai sur a pukna ning a kamis i sup ia.

¹⁴ A kama woroh na hanua ning, di toli ana ning a bonot pa pisir naur a hat. Pa ting na hatatla ning, di ka tumus tar a risan ning a bonot pa pisir naur a aposel anuna Nat a Sipsip.

¹⁵ Pa takai a angelo ning mia warwara, i tong pas ning a utna ning di toli ana gol, suir mak a hanua Jerusalem ono, pa ir mak otleng na taman pa na woroh.

¹⁶ A hanua ning diat a ris ono, la arlar rop tar ka. A barahna pa palarna dia arlar ka. Ning i

21:10: 21:10 Esekiel 40:2

21:11: 21:11 Aisaia 60:1-2, 19

21:12: 21:12 Esekiel 48:30-35

21:15: 21:15 Esekiel 40:3; Tatatai

11:1

mak a hanua ana nuna tuka rakai, a barahna i arlar ana ning a bonot pa pisir naur a rip a stadia*, pa palarna pa tuntunurna, ditol arlar rop ka.

¹⁷ A angelo i mak a butbut ana woroh, i arlar ana ning a mar diat a bonot pa pisir diat a kubit†. I mak ana mak ning a tarai la sira titol ono.

¹⁸ A woroh di toli ana jaspas, pa hanua di toli ana gol rop ka, ning i totoh kol arlar ana galas.

¹⁹ A kama woroh na hanua ning, di amermer tari ana urmatana ngas a hatat rop ning la wakak kol pa matanla i abit. A ningnigona di toli ana jaspas, a munaurna a sapaia, a bulu na hat, a munatolna a aget, a makada na hat, a mundiatna a emeral, a makada na hat,

²⁰ a mundilimana a sadonik, a hat ning i kokok pa i kubar, a mundionona a konilian, a kubar a hat, a maisna a krisolait, a sinang a hat, a siwalna a beril, a makada na hat, a siukna a topas, a sinang a hat, ning a bonot onoi a krisopres, a makada na hat, ning a bonot pa pisir takai onoi a jasin, a bulu na hat, pa ning a bonot pa pisir naur onoi a ametis, a kubar a hat.

²¹ Takai a bonot pa pisir naur a taman, di toli ana kiau a kabokabolla. Ning a taman ning a kiau a kabokabol. A ngas ting na hanua di toli ana gol rop ka, i tai solsol arlar ana galas.

²² Bel a oroi ta rumai artabar ting na hanua ning, anasa a Leklek e God, ning i rakrakai kol,

* **21:16: 21:16** I arlar ana naur a rip pa naur a mar (2,200) a kilomita. † **21:17: 21:17** I arlar ana diono na bonot pa pisir dilima na kilomita. **21:18: 21:18** Aisaia 54:11-12

pa Nat a Sipsip, diau a rumai artabar tingia.

²³ A hanua ning bel i kapan sur a kamis pa kalang diar atalapori, anasa a matatar ane God ot i atalapori, pa Nat a Sipsip ot, a lam tingia.

²⁴ A tarai miting na matanitula rop lar han ana talaporna, pa kingla mite na rakrakan hanua lar los kas anunla na matatar usaot teteki.

²⁵ Bel ma ta pukakiar ulak ning na taman lar tagar, anasa bel ma ir morom ulak tingia.

²⁶ Na tarai miting na matanitula lar los kas anunla na ututnala na leklek, pa anunla na matatar usaot teteki.

²⁷ Bel ta dur a utna ir kas tingui na hanua ning, pa bel tik ning i sira tol a ututnala na meme pa bel tik otleng ning i sira اساسongo. La ka, ning di ka tumus tar a risanla ting na buk a lalaun ana Nat a Sipsip lar kas.

22

A malum a lalaun pa rakai a lalaun

¹ Lamur a angelo i asangan iau ana malum a lalaun, ning i talapor arlar ana galas. I saler ot miting na keskes a king ane God, anundiau taum ana Nat a Sipsip.

² I saler pотор a tnan ngas ting na hanua ning. A rakai a lalaun i tur ting na naur a ris a malum ning. I sira wai ning a bonot pa pisir naur a maskana wana. Ana kalangla rop, i sira wai,

21:23: 21:23 Aisaia 60:19-20; Tatatai 22:5 **21:24: 21:24** Aisaia 60:3, 5 **21:25: 21:25** Aisaia 60:11 **21:27: 21:27** Aisaia 52:1; Esekiel 44:9; 1 Korin 6:9-10 **22:1: 22:1** Esekiel 47:1 **22:2: 22:2** Stat 2:9; Esekiel 47:12; Joel 3:18; Sekaraia 14:8

ning a bonot pa pisir naur a kalang ana taktakai a rau. Pa pakanala i sira alangolango a taraila miting na matanitula kusun a tinsamanla.

³ A laulau a ututnala ning a balakut ane God i kes ono, bel ulak ma dir oroi tari. A keskes a king ane God pa nuna Nat a Sipsip ir kes ting na hanua ning, pa na tena titol oros otleng ane God lar lotu teteki.

⁴ Lar oroi a patarna, pa dir tumus tar a risana ting na patarinla.

⁵ Bel ulak ma ta morom. Bel lar kapan sur a talapor ana lam pa talapor ana kamis, anasa a Leklek e God ot ir saran a talapor tanla. Pa lar warkurai arlar ana kingla, bel ir rarop.

⁶ A angelo i atai iau mang, “A warwarala ne i momol pa di tolsot pasi sur dir tortorot ono. A Leklek, e God, ning i nigon a ingun a propetla sur lar apuasa anuna warwarala, i sune sen anuna angelo sur ir asangan tar anuna tena titol orosla ana ututnala ning milau ir hanot.”

A tinan ot ulak ane Iesu ka milau

⁷ E Iesu i atongi mang, “Oroi, milau ma ar hanot! Esining i mur a warwara na propet mite na buk ne, i angis.”

⁸ Iau e Jon, ia ka longor tar a ututnala ne pa ia ka oroi tari. Ning ia ka longor tari pa ia ka oroi tari, a punga tar milau naur a hana angelo sur ar lotu teteki, a angelo ning i asangan tar a ututnala ne tak.

⁹ Ika i atai iau mang, “Gong! Iau otleng a tena titol oros ka arlar hom pa na tastasim, na propet, pa la rop otleng ning la mur a warwarala mite na buk ne. Ur lotu tetek e God!”

¹⁰ Pa i atai iau mang, “Gong u pidik alar a warwara na propet mite na buk ne, anasa a taim ning a ututnala ne ir hanot ono ka milau.

¹¹ Esining a tena tol a laulau dir noreni ot suir tol a laulau, pa esining i dur, dir noreni ot suir tol a dur a toltol, pa esining anuna toltol i tostos, dir noreni ot suir tol a tostos a toltol, pa esi otleng ning i totoh, dir noreni ot suir tol a totoh a toltol.”

¹² E Iesu i atongi mang, “Oroi, milau ma ar hanot! Ar hanot taum ana arlou, par lou a tarai rop arlar ot ana nunla na titol taktakai.

¹³ Iau a Alpa pa Omega, iau a ningnigona pa murmurna, a kamkamna pa araropna.

¹⁴ “La ning la gos anunla na kaen, la angis, pa i tostos sur lar hangan ting na rakai a lalaun pa lar kas ting na taman a woroh na hanua ning.

¹⁵ Ika, a papla, na tena wah, la ning la tol na pamuk a toltol, na tena umkol a tarai, la ning la lotu tetek a asasongo na godla, pa la ning la mang sur a asasongo pa la toli ot, la kanumo lapiu na woroh.

¹⁶ “Iau e Iesu, a sune sen anuk a angelo suir saran a warwara talapor ne tetek mulo, a tarai a

22:11: 22:11 Daniel 12:10 **22:12: 22:12** Aisaia 40:10; Jeremaia 17:10; Tatatai 2:23 **22:13: 22:13** Aisaia 44:6; Tatatai 1:8, 17; 21:6
22:14: 22:14 Stat 2:9; 3:22 **22:16: 22:16** Namba 24:17; Aisaia 11:1, 10; Rom 1:3; Tatatai 2:28; 5:5

lotu ting na hananuala. Iau a wakir oe Dewit pa e tubuna, pa matlai ning i talapor kol.”

¹⁷ A Talngan Tabu pa tona tinaulai, a hane, dia atongi mang, “Han ute!” Pa esining i longori, i otleng ir mang, “Han ute!” Esining i mos, i wakak sur ir han ute, pa esining i mang suri, ir gang a malum a lalaun ning bel di sira lowi.

A araropna

¹⁸ A atumarang la rop ning la longor a warwara na propet te na buk ne: Ning tik ir tugus tar ta warwara masik ana warwara na propet ne, e God ir tugus tar otleng na akadik teteki, ning di ka warwara talapor tar ono, te na buk ne.

¹⁹ Ning tik ir kepsen ta warwara mite na buk a propet ne, e God otleng ir kepsen anuna tiniba miting na rakai a lalaun, pa miting na totoh a hanua ane God, ning di ka warwara talapor tar onoi te na buk ne.

²⁰ Esaning i warwara talapor ana ututnala ne i atongi mang, “Momol, milau ma ar hanot.”

Amen. Han ute a Leklek e Iesu.

²¹ A marmaris anuna Leklek e Iesu ir kes taum ana tarai rop ane God. Amen.

A Wakak a Warwara ane God
The New Testament in the Label language of Papua
New Guinea
Nupela Testamen long tokples Label long Niugini

copyright © 2023 Wycliffe Bible Translators Australia

Language: Label

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-02-02

PDF generated using Haiola and XeLaTeX on 11 Mar 2026 from source files dated 2 Feb 2026

13fa0832-6e31-5347-b6eb-57b79224ca94